


孟鄰堂文鈔

卷十二至卷十四



孟鄰堂文鈔卷之十二

武進楊 椿農先氏著

曾孫魯生校



高安朱公六十壽序

今

天子雍正二年太子太傅吏部尚書兼都察院左都御史高安朱公年六十其生之辰在八月十有二日先七日

天子命公總裁會試京師士大夫相約徹簾之日其往稱觴為壽竊嘗讀尚書唐虞三代明良喜起之風可謂盛矣然君之詔其臣臣之頌其君者惟曰推賢



讓能庶官乃和萬邦黎獻其惟帝臣而已蓋用人者朝廷大政以人事君人臣立朝之大義也夫惟不僅以賢之舉者爲樂而轉相汲引惟恐有不舉者爲憂益稷篇曰其弼直惟動丕應俟志以昭受上帝天其申命用休君奭篇曰天惟純佑命則商實又曰天壽平格用賢之朝君若臣共嚮昇平之福天必報之黃耆之壽焉所謂皇建其有極斂時五福予攸好德汝則錫之福是也公壯歲登朝受知

聖祖今

上嗣位命公三主文衡又命兼古冢宰御史大夫之職凡有陟黜多諮之以行蓋

國家激濁揚清掄才鉅典皆於公是任而公惟日孜孜迪知忱恂以仰副旁求至意弼成

盛朝億萬載丕丕之基則今之年甫及耆以視古君臣年皆百有餘歲都俞揖讓於一堂之上公年特始基之爾臯陶謨有之曰知人則哲能官人何憂乎驩兜何遷乎有苗何畏乎巧言令色孔壬竊思巧令之徒止於容悅何至與驩兜有苗並顧聖人畏之甚於二人者孔子曰巧言令色鮮矣仁朱子曰好其言善其色而本心之德亡矣夫惟亡其本心而容悅是計

將患得患失無所不至所以爲尤可畏而舜之咨牧必先難壬人者此也公事能哲之

主所舉皆敦茂樸實之人視彼取人步趨應對間惟恐人之不巧令者公之道殆與臯夔者侔矣考造曷可量哉

蔚岡劉公七十壽序

今

上乾隆九年二月初七日協辦大學士事吏部尙書蔚岡劉公年七十吾縣宦於朝者登堂稱慶以椿年差長屬爲祝釐之詞椿惟公官禁近事

聖祖者十有一年

世宗踐阼召入

南書房備顧問自是敷歷中外餘二十年燕魏趙代齊魯三秦五涼七閩之地靡不至學校倉儲銓選荒政河渠農田明刑詰武之事靡不爲公設張舉措動中機宜靡不本於寬大方公之賑山東也總督某以山東民不以求賑爲恥而以與賑爲榮官吏乘機侵蝕捏賑冒銷以阻公公不激不惑不濫不遺用銀以兩計者三十餘萬粟以石計者百萬山東民藉以不饑東北水利廢久矣

憲皇帝興修之召江南老農營稻田於近水之鄉所
司報不以實以旱田爲水田者五百三十二頃有奇
歲買穀償官民甚病之公具入告

憲皇帝曰營田以利民也乃厲民耶命公與高安朱
文端公速正之畿輔故多盜例不分首從公閱成獄
一十有四應入者一百六十人奏曰此皆饑民名雖
爲盜所劫升斗菽粟錢數百文耳請矜之

詔罪其爲首者餘未減著爲令西事之殷也大軍次
巴爾庫爾公駐肅州奏開柳林湖諸屯歲入穀數十
萬石以給軍而九家審水利功尤奇九家審在肅州

西北桃來河之東田高水下山橫互其間公鑿山爲
洞過水以溉田帑不足繼之以俸功成軍用益饒民
到於今賴之士魯番萬餘人來歸衆議處之內地公
以爲不可建言瓜沙二州水土間曠可耕可牧宜徙
回民於此西州由是晏然其他嘉猷偉績在人耳目
不可一二舉蓋敬以事

上惠以養民智以謀始勇以決幾用能上答

主知下孚輿望功名立若斯之卓卓也椿與公皆
莊之自出公外祖姑先大夫之伯姊也公方未遇時
先大夫目爲國器每舉以勸椿兄弟茲觀公建樹衆

咸服先大夫知人而益信公爲不可及也椿弟乘萬
從子若游往與公同登進士官翰林今忽忽踰三十
年公獨龐眉皓髮

天子是毗回憶少壯舊游其亦有盛衰聚散之感乎
詩有之樂只君子遐不眉壽樂只君子德音是茂又
云天錫公純嘏古之君子祿壽康寧皆推本於德而
其中亦有莫之爲而爲者焉故詩詠之曰天也椿敬
舉爲公壽并與天下蒼生共祝焉

懸水吳公七十壽序

雍正八年十二月四日內閣學士兼禮部侍郎青陽

吳公年七十公之子翰林院編修兆雯乞言於余余
聞之詩曰芄芃械樸薪之楨之濟濟辟王左右趣之
又曰周王壽考遐不作人釋詩者云芃芃盛貌楨積
也言周材所以盛者由文王之壽故能遠而作人致
此衆多之賢而引而聚之於朝猶山木茂盛萬民得
而薪之又載而積之也又曰豐水有芑武王豈不仕
言豐水潤澤而生芑穀猶周德深厚而多賢才武王
皆仕使之所以廣文王之聲而成數世之仁也我
聖祖仁皇帝在位六十餘年長育天下之才無所不
至今

孟子文金卷二
天子建中陳教以道藝陶成之者又八年於此矣公
生於

仁皇帝御極之年鄉會舉於

萬壽六旬之歲今

天子初年首膺簡擢游參政府夫七十年中漸濡德
教爲國名臣者何可勝數而公之生平乘時應運抑
若天之有獨厚焉蓋詩言崧高維嶽駿極于天維嶽
降神生甫及申記以爲文武之德也公際累洽重熙
世家九華山下天地山川靈淑之氣鍾而生公夫豈
偶然之故哉公之爲諸生也歲乙酉

仁皇帝南巡召試江南文學之士入書局纂修前後
五十五人癸巳春與公同舉於鄉者一千三百二十
二人其秋同會試舉者一百八十六人同

殿試者二百人今多布於有位宣力

王家而公與今禮部侍郎吳縣吳公皆

仁皇帝在江南時所取士也內閣學士溧陽任公湖
南巡撫景州魏公則公

殿試時第二人第三人也於以見我

兩朝作人之化媲美有周則豈特一時臣子被之其
垂諸奕世亦將有無窮之聞也已詩又有之曰鳳凰

于飛翩翩其羽亦集爰止方今鳳凰集於房山公偕
中外諸賢藹藹萋萋共贊

國家之盛自時厥後

聖天子純嘏爲常而公以百齡壽耆再聆鳴鳳之聲
繼卷阿而有作不更休歟椿附公鄉榜之末後隨公
史館沐

兩朝教育之恩者深故於公壽推國之作人者壽公
亦詩人之意也

于岸齋八十壽序

金壇于岸齋先生以山西僉事年未六十致仕家居

先生之子若孫若從子從孫從曾孫從元孫鄉會成
進士同時登館閣宰州縣者凡若干人先生高年碩
德爲東南耆宿蓋自康熙丙午先生舉於鄉迄今雍
正丙午甲子一周先生年亦已八十矣歲秋七月先
生初度之辰四方士大夫與先生子孫游者相約稱
百歲觴謂余不可無言也余惟一代之興必有世家
巨族若唐之崔張宋之韓呂而其人亦皆敦龐耆艾
蓋史稱明以進士科取士其甲第蟬聯者或五世或
四世或三世頗有惟眉之萬新都之楊烏程之董閩
縣侯官之林三世一堂而侯官林氏尤盛方太守春

澤百歲時有司爲建人瑞坊子戶部侍郎應亮孫工部侍郎如楚咸歸省

本朝兵部侍郎海寧楊公親見子孫成進士而鄞縣林必達丹陽賀寬嘉善錢黯皆於康熙間復遇本身會科而宛平韋雲鷺以順治丁亥成進士康熙丙戌禮部奏復預瓊林之宴今

上元年大學士華亭王文恭公今歲

予告大學士太倉王公俱仍值鄉舉之歲蓋國家治教休明重熙累洽天必生壽耆應之若先生輩豈非聖朝人瑞儒林之盛事也哉先生家去茅山不數十

里而近昔人謂洞天福地其土良水清居之者可延年度世先生之先自明萬載縣知縣契元發科以來十有一傳代多壽耆契元倡明理學治縣有聲先生曾祖景素與顧端文高忠憲二公講學東林爲萬厯間名臣先生尊人毅齋以名進士出知襄垣襄垣人稱慈父焉先生少壯登朝敷歷中外常分校京闈衡文三晉尤以公明見稱先生子孫文章彪炳或治行循卓蓋昔科第之盛者發或始於其身或旁不及於羣從先生上承祖考之彝訓下式穀其子孫所謂崔張之世閥韓呂之家風先生殆兼而有之豈非縉紳

之尤盛者哉先生分校時先大夫實主試事每稱先生盛德歲戊戌余入史館與先生第五子枋同館纂修而先生第三子樹範從子梓復與余兄弟有婚姻之約余故知先生最深抑明宏治中太倉毛弼年百歲其孫澄狀元及第朝廷特建人瑞狀元坊今先生年雖大耄精神完固尙如五六十歲人孫曾緝緝繩繩將有登上第如文簡公者更二十歲先生年屆期頤有司啟行故事余時執筆以紀先生家慶當不獨爲先生賀已也

貴州王翁七十雙壽序

貴州起唐王君自翰林改任刑部之十月尙書上其賢能

天子特命爲廣西知府時雍正二年十二月也君父封檢討君母趙孺人明年年俱七十君將迎養於官舍諸同年以歲之正月及君之未行也奉觴於堂屬余爲序余惟成周盛時天下和平萬國歡悅士大夫出使於外則必命酒醴以宴樂之又作歌以道其情曰王事靡盬不遑將父王事靡盬不遑將母蓋上之人曲體其臣知其臣不能自言而代爲之言如此其詳且至也且夫有親而不能養有祿而親不待人子

之至戚也古之君子重其祿而輕其身祿不過鍾釜
尚猶欣欣而喜者非以爲多也樂其逮親也北山鵠
羽之詩作賢勞之臣有陟岵岵以瞻其父母甚或致
歎於尸饔者矣此四牡之歌所爲惓惓也今
天子孝治天下士宦於朝者父母在堂則子有省親
之假就養而歸也又命之送親以安之宦游所至或
道里之相近或風土之相宜又皆得奉親以往故今
之仕者以逮養爲樂而尤以侍養者爲榮君貴州人
也仕於朝八年矣茲出守廣西廣去貴千里而近山
川民物風謠俗習之變在廣猶在貴也君爲

國旬宣退修子舍晨昏之節封檢討君與太孺人龐
眉皓髮受二千石之養豈非
聖朝厚澤臣子之至榮也哉

外姑范宜人壽序

康熙三十六年九月外姑范宜人人生於是五十有
一年矣椿方以事至海上不克從諸甥於其日爲壽
其冬自登州還始爲文以進曰余之爲壻於沈氏也
吾父芝田翁與吾舅東田翁皆年少新成進士相得
懽甚而吾母莊宜人與吾外姑以婚姻二母相聘問
甚樂也未幾先宜人卽世後十有二年宜人女來

歸宜人戒之曰汝無姑之婦也汝其勉之吾父亦謂
椿曰汝妻不及事汝母凡事以汝外姑爲法可耳蓋
宜人之德有古后妃夫人之風而吾妻二三年來雖
嬪於余矣而其左右提挈誥教殷勤使吾妻無姑而
若有姑者惟宜人是賴以是知宜人自淑與淑於家
者其爲壽正未艾也惟是宜人之生與吾母同年月
吾母長宜人七日耳以今觀宜人福履竊念先宜人
之德與宜人同而竟不克饗中壽以觀其子之有室
椿實不能無憾宜人有子三人往年長舅天維舉於
鄉後十有八日適當宜人五十之誕辰余作詩以贈
曰最羨萱堂正五旬泥金帖子報方新楊郎倍有傷
心事不見慈親十四春葢天維之得舉尙未足爲天
維賀而其奉觴上壽於宜人之側與宜人饗之者此
則余之不能不爲之欣然色喜而繼之黯然自傷者
也今年天維成進士矣而諸舅不日皆伴有騰騫之
望以余失恃每進拜舅姑於堂下見吾舅姑雙雙諸
舅雁行左右則凱風黃鳥余益何以爲情故於祝壽
不爲頌禱常辭聊以書所慕而已

外姑范恭人八十壽序

外姑范恭人爲翰林院編修青城之子婦外舅翰林

五齋堂文錄 卷二
院侍讀學士東田之配翰林院檢討伏庵之女也恭
人于歸時祖姑周太孺人猶在堂恭人事姑范太恭
人以上逮太孺人咸得其懽心太恭人嘗曰吾子婦
雖多惟新婦善知我意太孺人亦謂編修曰第三孫
婦有福相將承先啟後學士於兄弟行第三也編修
侍養家居學士與兄瞿庵先後入翰林伏庵以博學
宏儒特授爲檢討恭人內外兩家之盛冠於一時
學士官 禁近恭人隨在京師歲丁丑恭人以學士
貴再受封誥長子天維適成進士人莫不爲恭人慶
後六年學士卽世天維與子庠生坤一亦早逝家門

盛衰之際恭人處之宜不能無慨也今年雍正四年
丙午上距學士時二十有五年矣恭人於是年八十
女之壻彭阼徐德俶楊椿謀所以壽恭人者而屬椿
爲之祝釐之辭竊聞天地之數不能有泰而無否亦
不能有剝而無復如寒暑相推日月運行其理蓋有
必然者易曰泰者通也物不可以終通故受之以否
剝者剝也剝窮上反下故受之以復否之初六拔茅
茹以其彙否之所由生也復之初九不遠復无祇悔
復之所由成也恭人五十以前一門鼎盛舅甥父子
並居華顯有拔茅之象矣近二十五年家鮮膺仕則

或見爲中落然恭人年雖耄耄其操家勤儉課子孫如往時諸子孫循循雅飭克遵恭人之教將不遠之復其在茲乎易又有之曰受茲介福於其王母前日之泰天旣以恭人受其福今日之復不又以受之恭人者爲大乎夫歲星十二載一周是爲一紀數紀之後其將復興沈氏之興必自今年未年始編修學士鄉會舉之歲也恭人好讀經史多識本朝名公卿故事以今倣古舊家世族有厯數紀不復其始者乎椿也壻於沈四十八年矣往歲甲子獲拜編修公范太恭人於里第後侍學士公最久至今音容笑貌尙能爲諸孫道之茲道遠不克奉觴恭人之側而竊喜曩時周太孺人之言之有驗於今也敬書之爲恭人壽

蔣母曹太夫人八十壽序

雍正三年十二月七日戶部侍郎常熟蔣公之母曹太夫人年八十先一月

天子御書恩榮壽母四字賜之屆期公年友某與公朱陳之好乃來徵余文以紀其盛椿嘗讀周易晉之彖曰康侯用錫馬蕃庶晝日三接說者曰晉之貞士也其悔火也坤爲布爲衆有懋賞之象焉故曰錫馬

五經堂文少 卷三
蕃庶離日也日爲耀於土上故曰晝日三接坤順也
離麗也內順而外麗盡臣之美道故爲上所與得厚
賜而被親寵也二爻曰受茲介福於其王母說者曰
坤地也故稱乎母六二柔而中正處內成德鳴鶴在
陰則其子和之所以受介福於王母也介福者被親
寵而得厚賜也王母者尊之也介福者大福也大福
而歸於尊親源遠而流長基廣而植固也侍郎壯歲
登

朝受知

聖祖入直

南書房者餘二十年今

上卽位自參政府進佐春官司國計復兼

綸扉之任蓋

上之眷注深矣太夫人就養

賜第晨饘夕膳之珍歲時頒於

內府

仁皇帝朝嘗

御書堂額及柱聯以賜今

天子恩秩有加寵榮優渥太夫人躬麗順之德享期
頤之壽侍郎爲國名臣出則靖其匪懈以事一人入

則子舍逡巡率羣子姓修板輿輕軒故事家庭之內
肅肅雝雝母道也臣道也子道也太夫人侍郎備之
矣椿又聞之魯頌曰令妻壽母旣多受祉黃髮兒齒
蓋大夫庶士竭其忠愛之誠而致其頌禱之意歸美
以報其上耳若行葦之引翼采菽之臝申昔之人所
爲致隆其下者不聞及於閨門而四牡之靡盬且有
將母來諭者矣以觀太夫人何其福之備而侍郎之
受於母以獲乎

上者何其厚歟將四牡無歌而采菽行葦之風皆可
徵諸彤管則豈特太夫人一門盛事而實

聖朝邦國之光也已

胡母章孺人五十壽序

今年冬吾師大興舒先生之內嫺胡母章孺人年五
十其守節二十有八年矣府尹某奏之 詔旌其門
如會典先是孺人夫聯飛旣早卒孺人撫夫從子某
爲己子未期而殤族人復以從子振祖爲之後又撫
之十八年而卒孺人悲思哭泣胡之宗老謂孺人賢
不可無後也僉謀以從孫某後之或引宋庾蔚之言
間代取後古未之聞余時在先生所先生以問余余
曰儀禮經云爲人後者釋之者曰不言所後之父或

後祖父或後高曾凡諸所後皆備於其中小記云爲慈母後者爲庶母可也爲祖庶母可也夫祖庶母尙有爲後之文况從祖從祖母乎晉荀顛無子以從孫徽嗣庾純曰是小記所謂爲祖後者也何琦之從父以孫紹族祖琦謂宗緒不絕若昆弟以孫若曾孫後之理宜然也荀氏潁川名族何琦庾純古之習禮家其言鑿鑿如此近崑山顧炎武無子以從子洪慎之子世樞爲之後其甥徐尙書乾學著議是之則今胡氏之立孫奚不可也先生曰然命述其言爲之壽俾知孺人守節難守節而撫孤尤難撫孤而不育撫之至於再至於三則尤難也夫自古婦人無子能撫族人之子爲子以延夫之祀者未有不享其報者也矧孺人之備歷艱辛者乎詩有之子手拮据予所捋荼予所蓄租予口卒瘁又曰恩斯勤斯鬻子之閔斯吾於孺人嗣孫望之矣

沈母范孺人五十壽序

翰林院庶吉士吳縣沈君景瀾之母范孺人以今年八月十八日爲五十誕辰沈君尊人振齋官於粵沈君乞假於

朝往爲孺人壽乃先以壽詞來請於余余惟沈范皆

吳中著姓振齋曾祖兵部郎中笏林孺人曾祖提學
僉事長倩同里相睦也范故以女歸於沈振齋祖母
封孺人晉封太恭人者也太恭人生子三仲爲振齋
之父翰林院編修瞿庵叔爲翰林院侍讀學士東田
學士復娶於范長倩之孫女翰林院檢討伏庵之女
也封孺人晉封恭人孺人於恭人爲從女於太恭人
爲從孫女沈范三世重親百餘年於茲矣先是瞿庵
與學士成進士同官翰林瞿庵尊人編修青城暨范
太恭人咸在堂數年瞿庵卒於官振齋於時方在娠
又數月振齋始生又數月編修亦卒太恭人以育以
教又十四年振齋餼於庠又四年太恭人歿其復婚
於范也蓋太恭人之意云振齋成童時學士方在朝
長子天維成進士太恭人念瞿庵獨早逝其望振齋
尤切振齋自幼嗜讀書工文章事太恭人暨生母宋
孺人以孝聞太恭人暨學士咸愛之今去太恭人世
三十有五年學士歿三十有二年矣昨歲己酉振齋
以孝廉薦於朝

天子特用爲知縣又四年景瀾成進士官翰林孺人
相夫訓子備有賢行易有之受茲介福於其王母詩
曰令妻壽母笏林之配周太孺人年九十六歲范太

孟鄰堂文集 卷十一
恭人年七十九歲范恭人年今八十有八尙康強如
四五十歲時蓋坤道無疆爲妻令而爲母壽故嚮福
恆多匪特眉壽已也又將有介福施於孫子子孫受
之若沈氏諸母是已景瀾今歸爲孺人祝也振齋與
孺人華堂並坐子孫奉觴上壽回憶數十年前孤童
奮迹祖母太恭人之所以訓叔父學士公所以造就
之者其必將悄然感悠然思听然爲景瀾兄弟暨諸
孫引滿也已

少保楊清端公墓誌銘

光祿大夫太子少傅總督湖廣軍務兼理糧餉兵部
右侍郎兼都察院右副都御史楊公諱宗仁字天爵
其先山東沂水縣人徙遼東世爲遼陽名族

國初隸鑲白旗佐領下今

上改入正白旗遂爲正白旗人也公少沉深有智量
於世俗聲勢利欲不一動其心慎交游寡言笑嘗與
人言志曰士當審其所當爲嚴其所不可爲而已或
勸之仕曰吾斯未信雖聖賢不能必吾敢苟哉康熙
三十五年秋奉父命始出爲湖廣慈利縣知縣調藍
山陞陝西階州知州遷同知臨洮府事監收蘭州轉
知臨洮府事分巡西寧道陝西按察使司副使浙江

正德堂文金 卷三
按察使司按察使丁父憂服闋補廣西按察使署理
廣西巡撫未幾授廣東巡撫六十一年冬今

上登極陞湖廣總督既至奏緝大吏之尤溺職者數
人罷鹽規一十六萬以其利與民及商屏屬員餽遺
革重耗令官吏計口授費不得妄有侵漁累民濱江
州縣舊設征商口岸一百五十皆徹除之禁荆關額
外之稅於行旅者議湖南北分闡取士之制與數歲
甲辰江水驟漲捍禦有方築隄幾千百丈其冬設廠
以賑貧民民以不饑凡公所爲必求其利病所在與
俗所宜其利於己者未嘗肯爲之其利於民及行之

或有弊者興革之惟恐不速嘗待旦而興過夜分而
寢而公亦積勞而成疾矣雍正元年夏

上遣御醫來視又命公之子榆林道副使文乾爲按
察使侍養明年公疾稍瘳起文乾爲河南布政使尋
命巡撫廣東三年夏加公太子少傅

上方珍物中秘之書歲時賞賚不絕公益祇勤不敢
以疾爲解其秋七月公疾大作十八日癸丑公薨享
年六十有五訃聞

天子震悼贈公少保世襲拜他拉布勒哈番十二月
權將至京遣大臣郊迎奠酒比至命殯於城南里第

遣親王奠茶者再諭祭一壇賜公諡曰清端越三年
文乾自廣東給假歸治公之葬復加祭一壇時雍正
五年五月乙酉晦也公之令慈利也縣在萬山中與
苗接壤苗長虐其下制炮烙諸刑苗人畏之走匿公
縣界長以賄求之不得上官聞檄召公公曰苗吾赤
子也窮來歸我我以賂返之如民父母何上官直公
言乃止八排梗化提督林某帥師討之道出藍山林
不恤其下衆咸怨登山將爲變公單騎往諭衆感悟
喜曰聞公言我等不敢有異志向公羅拜曰楊公活
我楊公活我其在階州州古武都郡生羌時出爲民

害前知州患之不能制公連堡寨謹斥堠召其酋豪
明諭之酋豪震懾不敢肆康熙五十九年春文乾以
東昌府知府奉命西行道經階蘭臨洮西寧之地皆
公舊所治父老詢知公子感慕追思有牽衣不忍令
去者公善決獄在湖南常寧縣民有被仇殺者令疑
其爲盜寘十人於大辟

仁皇帝矜之詔所司重讞巡撫趙恭毅公以屬公公
訊得其仇二人十人者皆免在浙江以明允見稱爲
公平反者尤多也公素廉不妄取予其撫廣東也廣
故多盜地富饒海外之貨日至公帥下以清州郡修

整訖公去廣百姓幾莫有為盜者公先實後名與人
交未嘗以私干之人亦莫能干也性寬平不為劓絕
谿刻之行爲督撫所屬僚吏數千人公盡識其賢不
肖能否所薦引必當其人有不職先誨之其不改從
而糾斥之或見公時有戚容以詢公公曰吾適有所
糾爾其人曰公所糾必當奚戚爲公曰吾爲大臣不
能令官屬爲循卓致名列彈章吾寧能不戚乎公才
識明敏臨事善斷所至未嘗有廢務然不以行能驕
人趙恭毅公尤重之嘗指公謂人曰楊君奇才也不
久將任吾位矣世以此稱恭毅知人而服公爲不可

及曾祖諱繼盛祖諱必登舉順治乙酉順天鄉試父
諱朝正事

世祖章皇帝爲侍衛

聖祖仁皇帝時改兵部督捕司員外郎歷山東東昌
府知府治有能聲曾祖妣某氏祖妣某氏妣段氏公
之未至湖廣也段太夫人卒於公弟河南巡撫宗義
之官舍公在道星奔

上令宗義葬母歸而命公在任守制公時年六十有
三矣哀慕哭泣如孺子其年又四月
上念公勞勩賜祭公父母母贈公三世如其官妣皆一

品夫人公孝謹四時之祭雖老未嘗屬之子孫卒之前三日中元祀先公時疾已革左右咸請公毋拜公不可仍跪拜如禮公舉止端方燕處未嘗有情容雖盛暑不袒裼自奉淡泊布袍蔬食宴如也娶陳氏贈一品夫人子男一人文乾女一人適候選縣丞崔惟岐孫男二人應瑤候選府同知應琚一品廕生孫女一人適雍正癸卯舉人申澍曾孫男一人曾孫女一人俱幼初公與母弟宗義同時開府宗義歸文乾繼公撫廣與公接壤縉紳以爲榮公事聖祖勤勞三十年今

上時尤以潔已奉公深知大義爲

上所優獎迨公歿而

上褒諭曰孤介端方始終一節蓋公清廉勤慎或從來諸臣所能而其不事黨援則非他人之所易及也其僅與公同時得並獎者今浙閩總督高公其倬川陝總督岳公鍾琪等六七八人方皆列於有位而公獨不幸早逝

上所爲追念良臣深爲愴惻愈久不能自己者也公諭塋在宛平縣某鄉某里之原將葬文乾來請隧道之文椿與公同姓世通交好深悉公行事因爲撰次

復繫以銘銘曰

人臣之義正直爲先其或不然偏黨植焉惟我楊公
不偏不黨

帝特寵公百僚絕等公考公祖逮公之曾崇封四代
峻爵尊榮匪惟爵之又祀秩之籩豆靜嘉于公設之
祖考榮矣令子嗣節楚越連疆左旄右鉞駢蕃錫賚
惟其沃矣生死榮哀曷其及矣匪公之榮正直是與
孤介端方

天子所予西山之原渾河之濱有巋者墳納此銘文

尙書唐公墓誌銘

雍正七年六月都察院左都御史唐公執玉以疾請
告謂其戚友楊椿曰余病矣將乞休於朝

上其允我乎椿曰

上方嚮用公公雖病未必允公去古之人有請至十
四五卒不許且命之臥理者矣公其可得歸耶疏上
上命公署直隸總督印直隸治畿輔兼轄口外旗民
事比他督撫尤劇

仁皇帝末年官吏怠於久安多失職

上欲振新之比七歲督撫七八易皆不稱故命公公
固辭

上命公速莅事公爲人精明練達於直隸民生利病吏治臧否靡不悉旣爲總督益以厚民生澄吏治爲已任其弛張舉錯大小緩急務各得其宜九月大理寺少卿張璨自保定入見

上問公璨以公政事對

上喜璨復言公病甚

上惻然遣宗人府府丞冀棟診治公諭公曰張璨頃言卿病朕深軫念自今卿當節無益之勞凡事總持大綱無庸一一躬親爲也朕一時不能得人故畀卿劇任明春史貽直來京朕卽命之代卿也十一月公

疾有間

上諭公愛養精神量力辦事公接諭悚感不敢復言病矣公事

上不欺

上有問及事入告者言皆洞悉無隱情見僚屬必詢民疾苦所興革宜若何言可採奏行之曰此某屬吏所言也其有過誨之誨之不可而後糾之情不能上達必曲爲達之

上覽公疏章未嘗不嘉公辦事妥協奏對出於誠敬也或以益賦核減語公公言爲政在於節用非二者

謂也吾於經費奉行故事而已他何知耶原任熱河同知明亮請增熱河稅銀并請於榜什營三岔徵之上命公查覆公言稅銀原無一定年豐或額外盈餘歲歉則正額尙虞不足豈宜復有增加榜什營卽巴克什營也去熱河一百六十餘里熱河旣收其落地稅此又收其過路鈔銀不可長蘆巡鹽御史鄭禪寶以商人虧帑請增鹽價以爲商本

上問公公言爲商爲民

陛下原無歧視衆商不謹身節用先公後私而乃議增鹽價以厲貧民臣竊以爲非是雍正三年廷議耗羨歸公而元年二年之後納者州縣移爲他用前督已允之矣至是部議追還公言元二兩年耗羨民納雖在三年而歸公之令實自三年耗羨始且前督允其他用部臣今欲追之是爲小費而失大信於微員非

陛下體卹臣工之意又言畿南州縣倉穀實皆民欠今歷年已久部臣責償於州縣官則此數十年中一二百故官子孫槩行追比於情實爲可憫

上皆從之公持大體不詭隨

上之信任公皆此類也準噶爾犯約抄邊西北二路

孟嘉堂文金卷二
用兵官發帑以備軍需惟公在直隸事集而民不擾
八年五月晉兵部尙書九年九月病篤三上書請退
上以今吏部尙書協辦大學士劉公代公而命公還
京養病明年八月少瘳命管理刑部尙書辭不獲十
一年正月仍命署直隸總督再三辭
上曰朕固知卿病然此任非卿不可卿其爲朕强行
朕當令顧琮佐卿也二月病益革自是不穀食者一
月然猶日理公事不少輟三月十六日薨於保定官
舍年六十有五
上聞痛悼命有司給銀供葬事

上在藩邸久知州縣水旱多不報卽位後申諭督撫
毋匿災而督撫慮州縣冒賑且虞謂災之由己致也
固匿不以聞間有州縣報者沮之甚則以他事斥逐
之如是者十益八九惟公所屬州縣有水旱必報報
卽以聞

上蠲賑動以數千萬計而公之辦賑尤詳且善嗚呼
上之勤恤民隱公之仰體

上心者可謂至哉迨公歿遺奏云西師未復直隸雨
澤愆期臣死不能瞑目則豈非古之鞠躬盡瘁憂國
忘身者乎嗚呼忠矣公康熙四十二年進士浙江德

孟鄰堂文錄 卷二
清縣知縣陞工部屯田司主事充五十四年會試同
考官陞戶科給事中掌登聞鼓轉戶科掌印給事中
累遷鴻臚寺正卿奉天府府丞大理寺少卿太僕寺
正卿擢禮部左侍郎知雍正五年貢舉充五年武會
試總裁官陞都察院左都御史德清多巨族恃其家
貴官爲不法令少懦卽縱肆無所忌貴官亦無如何
公始至師門有以事逮者匿不出公奉印至師家曰
有官守者不得其官則去某今令不行請從此去矣
其師索其人急出之縣中驚相告曰公於某族尙如
此他可訛法哉將編審吏以五千金餽公公卻之而

罪其吏召縣民集堂下親勘之察其有田無糧者令
自首無田有糧者除之富無隱糧貧無賠課國初以
近京地給八旗將士別撥他縣地還民謂之代徵往
往地在於此而糧在於彼相隔或百餘里或五六百
里寄莊寄糧之名以起公在直隸請歸其糧於所撥
州縣官免追呼之擾民無跋涉之勞在戶科猾惡吏
肆姦於戶部戶部堂司官不問朝臣亦莫敢言者公
廉實劾之

仁皇帝命置於理官吏肅然在都察院糾察不避權
貴然未嘗訐人之私亦未嘗小過傷人人故憚公嚴

正而服公之仁恕公精於律例在刑部未嘗輕入人死罪在大理平反爲多而聽訟時尤能以德感人方公自德清北行縣民送者數千人有老嫗伏舟側桑下叩頭慟不已詢之乃其婦以不孝爲公所格而今孝事姑故也公好讀宋人語錄取其切於日用者書之門闌戶扉皆宋儒語也嘗自言吾才拙政事不如人可自力者勤耳勤必先由儉始書其柱聯曰將勤補拙以儉養廉曰吾以銘吾座右也及爲總督上褒公曰公勤不懈又賜扁曰恪恭首牧而上所賜養廉銀歲止用十之三四餘悉歸之布政司

遺訓子孫無受賻儀公其克勤克儉不負所志所學者矣公字益功一字薊門江南常州府武進縣人七世祖襄文公以文章經濟爲明嘉靖中名臣曾祖諱獻可祖諱字全父諱于旭皆贈如公官公少孤貧家多難母夫人伯兄姊妹咸失所公年十八至京訪得之迎母夫人伯兄養於家而嫁其姊於華亭錢氏妹於平山崔氏兄性剛使氣公事之如父終身未嘗有違言兄卒撫從子如己子公長身玉立望之儼然而與人溫溫久而未嘗有忤權勢人避之若免知舊之賢者雖寒窶尤樂與之親平居闔戶靜坐闕若無人

五洲堂文錄卷三
客至羹豆食蔬質疑問事歡如也夫人楊氏浙江衢
州府知府諱廷望女椿從姑也先公三十七年卒子
三孝本康熙庚子舉人江西撫州府知府少游雍正
己酉舉人候選知縣後公三月卒行健早殤女三壻
黃多錫莊模正其一未字孫男四人女二人曾孫男
一人女一人墓在陽湖縣永豐西鄉黃塘里祖塋之
側銘曰

維聖有訓國治家齊齊有未至治乃斯乖慨自春秋
世風不古以妾爲妻禁之罔顧彼子叔疑使子爲卿
有私壟斷爲世所輕自茲以還波流益濫有美唐公
不溺不慳公有數妾箕帚是執子復生子仍焉侍立
豈無綺縠衣布而已豈無梁肉脫粟而已公之兩子
邦家之彥誨以詩書助以敦善長膺

帝命出宰寧洋公力辭之

帝不公從其次在側有舉之者掣其薦剡曰此不可
人有私愛公則無之人有鄙念公則祛之公於今日
類軼羣超用施有政其績垚垚爰溯筮仕不比於權
介然特立受知

一人威不爲愾利不爲懊清獻之清孝肅之肅刻銘
於石納諸幽室直而不華舊史之筆

黃母吳太夫人墓誌銘

故大城縣學教諭封文林郎翰林院編修贈資政大夫刑部右侍郎大興黃公之配吳夫人將葬長子叔琳泣且拜乞銘於某曰吾母之歸先公也先曾祖妣暨生曾祖妣尙在堂吾母事舅姑以上逮兩祖姑咸得其懽心先公鮮兄弟友于羣從吾母視羣從姊妹如姊妹撫羣從子女均於己子叔瑄與妹之適魏氏者庶母袁孺人出也吾母慈愛之如一與袁孺人處終身無違言先公爲諸生時貧甚吾母黽勉有無上事舅姑下撫子女先公能不以貧故得盡心於學者

吾母之助也吾母訓子孫嚴叔琳自先公時蒙

恩賜進士及第官翰林叔琬叔琪叔璫相繼膺鄉舉先公歿叔琬叔璫成進士叔瑄舉順天鄉試咸服官內外諸孫或成進士或舉鄉會試宰劇邑司六曹而叔琳叔璫不自檢攝遭誣在理然旋即宥卹不終至隕越者吾母之教也吾母操家勤儉而性好周急治家整肅而御下以寬若其他閨門之事尋常女子所能蓋有不足道者也又曰吾母生長太平爲婦爲母餘七十年三膺

錫命四代一堂邦人大夫士謂吾母顯榮壽考福祿

孟齋堂文集卷之三
莫之與京而叔琳等追思吾母百年中家門興替骨肉死生聚散之際其變故多端吾母燕居深念蓋欣暢怡愉之日少而懷憂隱憫之時多吾母能隨所遇以義命自安少壯則以勤謹事姑嫜耄耋則以忠貞勛子姓董子所謂安處善而樂循理吾母實自然而與之合焉願君之爲吾母銘之也某拜受命退爲之論次日資政公諱華蕃夫人初封孺人晉封夫人又晉封太夫人子男五人女三人孫男十六人女十人曾孫男十三人女十六人太夫人卒年九十有二墓在宛平縣某鄉某原與資政公合兆銘曰

往在雍正歲陰惟卯德門壽母

天子有詔匪子之孝曷顯厥母匪母之教曷昌厥後行莫如德福莫如壽夫人有之

天子詔之凡百女士疇不慕之斲石書辭以焯厥美後百千年昭示無止

徐室陳少君墓誌銘

辛齋徐先生喪其側室陳氏之一月將葬乞銘於余余與先生同里閭有通家之誼義不可辭也乃爲之誌曰少君姓陳氏蘇之長洲人年十五歸於辛齋徐氏世貴顯而辛齋少以文名元配呂安人又賢甚自

孟齋堂文錄 卷十二
少君歸數月辛齋舉於鄉明年成進士人故咸爲少君幸而少君處之則有難焉者少君之始歸也辛齋之母潘淑人春秋高而呂安人復多疾家事悉付少君少君聰明柔惠能佐其夫人以上事淑人淑人稱爲賢孝而安人資其內助亦親之姊姪然也淑人病少君朝夕不離左右淑人歿安人以哀故疾轉劇少君奉侍湯藥煦煦然屬屬然如在淑人側也少君有二子三人女一人安人撫之如已出方淑人病少君二子殤少君泣已復自喜曰妾固願以身代今二子死吾淑人其有瘳乎遂止不復哭人以其賢少君而呂

安人知其志尤憐愛之夫自師氏保母之職廢德教不及於閨門婦人之能事君姑者少矣其能事女君者抑又罕焉有如少君則豈非古之淑媛而不幸天死此辛齋所爲悲涕而必欲乞文銘之者也少君生康熙二十四年九月十九日卒康熙四十九年三月十六日墓在武進縣某鄉某里之原銘曰
少君之存協於女君少君之死貽有稚子尙其珍之
惟女君之仁刻於墓門以永其聞

孟鄰堂文鈔卷之十二

孟鄰堂文鈔卷之十三

武進楊椿農先氏著

曾孫魯生校字

祭太傅鄂文端公文

嗚呼自古論相必觀其時論道經邦非世所知六府
順序百嘉鬯遂此相之能變理所致公相

天子內外寧謐百官得宜萬事成秩問農如何耕穫
濟濟問士如何膠庠容裔問商如何關市毋索問工
如何淫巧不作遠夷貢入西戎卽敘雨暘寒燠各以
其序太平無象於此見之公皆退然不敢自尸
帝嘗諭公公忠直諒世乃知公功深弼亮嘉猷入告

不語諸子何況戚姻何況僚采初爲方伯於古姑餘
政成道洽化及豚魚旋秉節鉞總制三省氓獠戶歌
生蠻知倣西北兩路王師攸聚公經畧之宋琦唐度
性最愛士旁求汲汲迨其得之薦若不及往歲昭陽
公奉

帝旨顛俊於朝士方藹藹椿素與公從未識面公及
朱公同聲並薦念昔范理受知南楊不交私揖不通
一行公旣爲國余敢自薄范子在前是倣是則後復
聞人道公平昔言必稱余匪朝伊夕余用是懼益不
敢渝以答知己以全其迂公今永歸敢效范子斗酒

隻雞哭奠靈几望公之像鬚眉若揚堂堂巍巍來舉
我觴

祭太傅舒穆魯氏文定公文

公諱徐元夢康熙
癸丑進士乾隆辛

酉年歿年
八十有七

惟我

聖祖化成久道公應運生斯德斯造今

上卽位秩以宮保食祿於家天真是葆在昔官人三
德六德翁受敷施咸熙庶績苟有一焉已爲國寶何
况我公兼茲衆好公之忠誠夙夜匪躬翼翼其敬溫
溫其恭公之孝友行於家人子孫婉婉童僕訢訢公

孟鄰堂文集卷三
之政事小大具宜敷歷中外各得所施公之教士獎
成誘掖見善必褒聞過斯惜公之與人坦白無私識
與不識表裏洞知公方未遇緼袍藿食一簞一瓢不
改其則迨公既遇三仕三已卑秩崇階不爲愠喜公
饗遐壽編摩不輟口誦心維孜孜矻矻衆咸願公純
嘏無極黃髮駘背以重王國云胡一病良醫莫差
帝心震悼士民嗟咨往歲淹茂公見椿文謂爲可教
遂以名聞自是二紀追隨館局獎我策我情意誠篤
椿也不材負公明訓公不謂愚助我休聞公今云亡
世孰予知拊棺一慟淚出予私

祭太子太傅楊文定公文

天生我公民之先覺道德文章事功理學方在滇池
如宋司馬讀書談道優游洛下卓然之操粹然之容
泰山喬嶽霽月光風今

上嗣服首詔召公公既至止命作秩宗載任成均教
胄斯職左右

皇躬以馮以翼公年耄矣而志不衰昌言贊贊惟日
孜孜公素忠清事上惟敬誠心行義交友靡兢初在
南中敢言不敢彼譖公者納公坎坎公既還朝畧不
一念棄短取長古人無忝亦有大賢拯公於厄終始

全公回天之力暨在

上前同議國是侃侃而談不徇其意世益知公好惡無我不黨不偏母側母頗惟椿先人與公交歡三同之誼情殷弟昆公往黔中上章則叩椿送國門揖公馬首今歲余月椿還自西見公殿中白髮倪倪公既逝矣先友盡矣惻愴於懷曷其罄矣託辭敘心愧不能悉述公之行以究萬一

祭少保楊清端公文

嗚呼我公受知

聖祖庾嶺之南命公巡撫今

上踐阼眷公彌篤畀以三楚俾之總督惟此三楚居國南鄉洞庭雲夢道阻且長民有未安公則佑之民有未知公則牖之察其嘖呻與其燠寒孰遒有喜孰膏而屯民利民病惟公悉之民欲民求惟公給之皞皞下民

帝心所依公保赤子遐邇具宜

帝曰俞哉汝惟予翼特晉爾階以究乃績民曰樂哉公我父母

帝俾我公悅和循撫鞠之育之穀之淑之方數千里咸公畜之芒芒三楚旣富旣臧南漸黔蜀北被秦梁

帝念厥功駢蕃賚予上下交歡戚休一體昔椿先子
友公尊人椿與公子世好彌殷往歲戊戌余客僧舍
公來訪我四月惟夏話言款款迄今如昨驟聞公訃
涕淚零落肴核旣旅牲酒旣陳靈其來降歆我豆籩

祭趙恭毅公文

昔鄉先正尙書孫公危言危行當代所宗惟先修撰
仁心爲質冬日春風胞與民物公自弱歲二公爲師
譬彼模範是則是晞上章執徐

帝特召公命之布政浙水西東旋秉節鉞輯和安擾
化洽人神江迴怒慄洞庭之南三苗所居公移撫之
氓獠歡如入總南臺晉掌邦計修撰之仁尙書之義
昔賢有欲不行甚難公在今日則惟其安謂公賢者
效公恐後恭儉求仁欲於何有有不知者久乃化之
廉頑立懦於公藉之人亦有言氣剛難合自古狷士
其流則愜公性清簡內直外方及其善善和氣充洋
聞一善言必窮其要見一善行必揚其妙今歲六月
公病幾殆

天子念公恩綸疊沛公旣愈矣入見

天子溫語再三聞者嘯唏公還至署庶務紛紜咸親
理之不以屬人未幾病革若寐而嚳諄諄喃喃皆國

孟鄰堂文集 卷十三 五
家事公往謂人匪懈臣職盡瘁鞠躬臣願斯息公今
歿矣

帝心孔悲內外臣民咸失所歸椿先諭德暨公同學
先子云亡公過期哭施於小子待以國士仍世通家
臭味然耳送公國門泣涕沍沍公兮既往何日來還

祭湯學士文

椿自垂髫拜公于邸忘年與分先子之以歲在協洽
椿試南宮倉遽聞變悲懷盡傷偕我弟季匍匐星奔
公哭於寢久要是敦淹茂之夏予季還京余亦是冬
列於承明公每謂人曰余爲賢束脩自好不愧其先

延我賓館解衣推食書史繽紛左圖右帙八月上旬
有客自西餽公名卷衡山舊題公示姻友懷清之堂
衆咸曰公長沙輩行公以詢我甲子先後因及圖中
氏名某某余舉一二愧未能悉公語諸君道余矻矻
困敦秋孟余季不祿顧我畏蹠眷我彌篤昨歲冬月
公以病告余候於家歸增戀嫪今歲春正余患采薪
不見公久心焉踉蹌王子日施問公之疾意公尙生
請益有日入門而眺賓客盈室升自東榮復者已畢
客有謂我子無徒戚公意諄諄無間易簣聞言轉痛
淚湧如瀉睠念先人有如公者公往謂椿子文駘蕩

五洲堂文集卷之三
唱嘆得神余心攸向公今逝矣何以酬公敘情述德
以誄殯宮敬與公子友如兄弟先世交親久而不替

祭姚贊善文

代

曩歲乙丑余客三楚歸舟訪君樅川之澣君時館我
詠園西舍賦詩飲酒古藤之下蒼松翠栢雪月交加
瑤臺十二燦然雲霞余別而東與君乖隔自是廿年
形蹤脈脈君承

主眷出入楓震常楊燕許大冊高文余伏田間老而
多疾君嘗念我寄我詩帙燕樹蒼茫吳雲渺瀰魚雁
頻仍情辭斐亶癸甲之間余病在牀君書北來曰母

自傷戒我聲律勉我加餐言皆藥石情若弟舅余竊
自念誰無姻婭知我愛我莫如君者余殆不起朝露
溘焉余銘余誄邀君一言孰知今日理固難論君兮
何往余豈久存

祭外舅沈學士文

代父

嗚呼當辛巳之十月君奔太夫人之喪余時弔君於
出土見君擗踊之節哭泣之哀余既助君以悲涕而
復慰君之誠君既南歸余悲離索凡五閱月而余亦
遂來河上方期不久與君聚而孰知君竟疾疢乎膏
肓嗚呼猶憶去歲秋杪同年趙秋谷自吳來浦述君

形神消釋而兒子椿亦以書來白外舅之有恙余時
謂此无妄之疾或不足以爲君慮然猶中夜三起而
爲君傍徨比聞君逝方信方疑如醒如夢而不覺心
焉之惻傷嗚呼余與君同譜二十五年矣旣重金蘭
之誼復申秦晉之歡方其追趨 禁近蛩巨扶將君
旣視余如手足而余亦遂目君爲雁行余體素羸弱
而君年五十尙如少壯君每念余之早衰而余覩君
之精神意氣竊謂君當壽考其可量奚昊天之不弔
乃今一旦而遽至於亡嗚呼已未之春同舉南宮者
百五十人今其亡者已過半矣而其在者亦如落落
之參商每與君念及輒不禁如剡之痛而有涕之盈
眶而况余與君交游之好婚媾之情其能不悲號哀
慟而奚止曩者中慨慷嗚呼君今已矣平居歌歡笑
謔自此不可復得而所得致哀於君者惟此一觴之
奠而猶使某不得以自將此余所以臨風悽愴而不
自知其轡已九結於中腸嗚呼尙饗

與劉岡陵書

庚春一別奄忽三年見託譜序近始乘暇爲之大懼
不能繼籍溪勿軒啟薪諸先生之作以表揚足下修
譜盛意顧其中遷徙世次間有一二可疑敢以詢之

左右冊府元龜南漢太祖安仁彭城人仕唐爲潮州長史五代史安仁上蔡人後徙閩中商賈南海因家焉宋史安仁上蔡人仕唐爲潮州刺史因家嶺表十國春秋安仁自上蔡徙閩中商賈南海因家泉州之馬鋪死遂葬焉閩書以爲汰口山劉店也蓋安仁系出彭城而居上蔡遷泉遷廣返葬於泉其以爲彭城者從其系出以爲上蔡者從其世居遷閩之地蓋在泉州遷廣之時卽在安仁之世非系出泉山而遷廣州也譜又云後主之後仍宅於泉統領始遷於常夫後主歸朝定居於汴故諸子皆官京職太宗眞宗屢

賑其貧若居於泉則建炎初統領何不南還而乃北遷常州之衝地乎朱子撰少傅神道碑忠肅行狀俱云少傅之先唐末自長安徙建五代史僖宗乾符五年南漢代祖謙已爲廣州牙將則兩家之遷大約同時一自長安一自上蔡一遷於建一遷於泉譜以爲五季之亂由京兆萬年始居泉山後分居廣州崇安者亦非也十國春秋宋史後主子四人長守節次守正皆宋崇儀副使又次守素咸平中爲侍禁後至內殿崇班天禧中爲閤門祗候又次守通供奉官孫二人長克昌爲三班奉職次國昌爲借職俱守正子而

不言後主之子名元後主之子名亢也後主之卒在太平興國庚辰年僅三十有九安得太平興國丁丑其孫已有登進士者乎朱子忠肅行狀遷建六世至忠顯公始貴顯而譜自安仁至統領乃有十六代之多疑亦有誤少傅父韜諡忠顯少傅子珙諡忠肅具見朱子碑狀又宋史本傳獨無少傅諡忠定之文豈少傅之諡忠定在宋史作後或宋諡之而史未載耶足下好學嗜古於譜事尤慎便中不惜示及幸甚椿再拜

與唐彥純書

邸春姚壽來京吾表弟以先尙書公志銘見屬椿時抱病未能也然不敢辭嗣因實錄事忙又未暇以爲已秋旋里未幾北上史書迫促子春仍復大病幾至不起每念尙書公志銘未就惕然怵然病中更增不適今春史書告竣入秋以來賤體亦畧稍安始得搦管爲之追憶見屬時倏忽十二年矣昔范德孺以文正公集請序於蘇文忠公越十三年乃克爲之今讀其文以不得見范公爲恨向往之誠有非言語可盡者椿與公同里年十四歲始識公於京師尋同寓登州署中晨夕砥礪以古人相期許其後同朝十有六

年備知公立朝大節兼悉公內行較之蘇公於范公
爲幸祇緣善病館事羈身故爾久稽非得已也今雖
撰就深愧筆力蕙弱未能表揚萬一然以耳目所親
見聞著之紙墨視世之附影希聲道聽塗說者有間
矣事祇書大者與人所不能者非畧也蓋欲公以事
重亦欲事以公重耳幸察從表兄椿白

寄姑丈曹星客書

椿謹啟姑丈大人座下椿聞古之君子論撰其先祖
之美而著之於後世其不知者謂之不明知而不傳
者謂之不仁椿家自先高祖母以來世有母德爲鄉

里所推重先修撰公嘗爲郎太孺人管太淑人作傳
而吳太淑人之行則有家大人所述行狀在獨是一
言一行於傳狀體不必載者顧或多未錄椿嘗欲裒
集之著爲遺事附古列女傳之後不幸幼年失母於
先代遺事多所未詳間嘗侍於家君家君每舉訓椿
兄弟且謂椿曰吾年十七而喪汝大母比汝喪母時
有知矣然亦不及汝姑之詳也汝姑長於余五歲余
六齡而就外傳其在大母側僅晨夕耳汝姑十八而
始歸曹氏嫁後居吾家左右大母者又四五年比汝
大母歿汝姑年二十有二矣以是不及汝姑之詳也

又曰汝姑丈侍先修撰之日久汝姑丈勤於記憶凡有聞見皆能志之矧於吾家其記憶必多也汝其可請聞焉椿退而思之昔柳子厚誌太夫人之墓備載聞於伯舅者而歸熙甫以早失恃見長老輒牽衣問故事今以椿之不明不能備知先代事而又不克諮於長者是重吾小子不仁之罪而終無以著先祖之美於後世也繼又念事之大者既已列於家乘而小者椿亦多得之家君矣今所未詳者特遺事耳然觀二南之詩曰采采卷耳又曰采采芣苢夫卷耳芣苢何足貴而采之者有所不棄采詩者亦必列之於南

蓋女子之行不出於閨門而事之易湮沒者惟閨門尤甚此詩人所以不廢而椿與先代母氏之事既欲得其大者而於小者尤不能無意也伏惟姑丈善推詩人之意念椿之不敏於知而其心則懇懇焉用是俾詳告之則楊氏數世之遺蹟庶不至於無聞而小子椿亦得免於不明不仁之罪則不勝幸甚椿頓首謹啟

與蔣東委書

自與兄別六載於茲椿心有欲做文字文之甘苦亦比前畧知而史事羈身未能稍暇間有所作見之者

非惡而忌卽鄙而笑耳天台齊次風學博識高人亦正直與椿相契昨外艱回籍今則英俊雖多竟莫敢與語者回憶少壯時與兄鄰巷而居每一文成就正於兄兄或不以爲然必往復再三嘗一日數過或連四五日或至旬日而後已今相隔數千里此時光景何可復得思之恍如昨日又渺若異世矣椿嘗言文不惟其似惟其是憶有謂椿文太似古人者兄笑曰此無他所出同故其神似耳椿言往年十四受業於弱六先生先生訓之曰五經左史文章之祖歸震川跪誦史記每篇必五百遍椿念跪誦可不必遍數則

不可不多自是午前讀諸經午後讀左史周而復始積十餘年所讀或數千遍數萬遍不止久之卽不求甚解文章之血脈義理之闡奧訓詁之同異皆昭然有會於心兄言子文所以神似者此耳椿謝不敢當其後迫於人事誦業遂疎今年老不能復讀讀亦不多文則自幼至今好言其所欲言未嘗有所摹倣恐摹倣則氣不必舒辭不必達矣用是不能多作作亦不工自忖可以公之同好傳之其人者平生曾無一二前歲靈臯臨別諄諄以及時收拾自己文字爲囑穆堂相晤亦屢言之今忽忽又復數年每念屈子云

老冉冉其將至恐修名之不立未嘗不汗流浹背愧無以對知己也目下館事已竣將從前藁草畧加討論雖言之未協而胸中所見不敢自匿敬質之左右南榮曝背不識卽能批閱否前見某先生批朱竹垞詩或點或圈或竟有全首抹去者卽此見前輩相知之雅望兄援以爲例勿徇勿隱并勿有所吝爲禱天寒順時自攝不宣

與舒殿臣書

接北錄得三世兄捷音尋接次兒家信知四世兄亦已入學不覺爲之狂喜吾師壯年卽世兩世兄孤童

奮迹思之又不禁悄焉以悲而繼之潛焉出涕者也吾師宏材盛德未究厥施太師母師母二代孀居丸熊畫荻期我兩世兄者甚切今兩世兄先後成名吾師未竟之緒將必於兩世兄發之椿也白首門生受吾師生成之德二十有四年矣未能報師恩於萬一而此中惓惓則未敢一日忘也易曰君子以虛受人又曰卑以自牧兩世兄學業無窮功名難量椿竊效古人贈處之義敬以此二言爲兩世兄贈可乎春闈伊邇佇聽好音不宣

答狄甥司載書

接三月廿二日書知有育嬰堂之舉不勝欣喜古聖賢不踐生草不履生蟲不麝不卵不殺胎不歿天不覆巢而况民之子女而可任其沉溺乎吾司載此舉可謂知所先務矣孟子云古之人所以大過人者無他焉善推其所爲而已矣願吾司載卽此推之凡養老恤窮義學義冢厲祭之事無不加意爲之地方偶有水旱必據實申詳毋避沽譽市恩之名毋畏捏災冒賑之謫以上負一人痾瘵下貽億兆姓之顛連困苦則百里內大小男女受吾司載實惠者殆不可數計奚止一堂之內數十百之嬰孩已哉自此爲州府

爲司道爲督撫無不本此心以擴充之則霖雨蒼生澤及四海者亦在是矣勉旃勉旃文以紀實佳惡原不在格調今古之間其事爲美事則其文爲至文惟有不忍人之心出之以不忍人之語真誠剴摯自足動人心目若賈彪事世之能吏類優爲之育嬰堂建則所謂徒杠輿梁成民自不病涉也何必以彪爲法哉京師育嬰堂制幼則乳母鞠之長則塾師教之有不知其姓氏至以育爲姓院試入學者吾司載傲而行之亦善推之一端矣吾司載精神強固志氣堅定再當於振作之中時寓豈樂之意詩云豈弟君子民

之父母又云樂只君子民之父母豈弟故樂也願吾司載思之來書貽笑云云似覺慮之太過勉從來意畧加損益可卽付之上石不必過於好古反致不達也四月二十日舅氏迂農白

答沈渭梁書

兩辱手書之便未答歉甚椿前浮沉史館心血半耗究於館事無補徒爲此身悔吝之端已冬旋里雖家無儋石而敝書盈篋泛覽流觀亦可稍娛歲月未秋聞命意欲引疾告辭當事以爲不可莫肯爲之轉達不得已馳驅北上倏忽二載餘矣元都觀裏依然如

昨自悼且自悔也頃有語椿者云某遇子厚且甚敬子盍以一刺謁之椿曰某與余無交其不薄視余者正以余未往謁耳若謁之旁人有不訕笑已心有不抱疚者乎比他人援上更無據矣昨歲家居有念椿貧窶語椿者亦如是椿亦以此告之夫一時之富貴有限終身之愧怍難消椿通籍三十年未嘗問津於人而招招舟子時亦有之雖知非不可應而事類執鞭濟便失其故我且賦性疎慵濟亦何益故毅然印否并不爲我友之須正恐濟復多事耳承兄知愛專此奉白椿再拜

附 蔣東委書後

素堂黃觀察雅好文士尤留心民瘼嘗與余言外間百物騰貴下至腐菜亦增直小民益難粒食矣余曰然無物不貴惟一物甚賤耳不寧惟是此物且有日賤之勢渠急問何物余故遲之曰君試思之渠思之良久曰實無其物君給我乎余激應之曰人品渠爲狂笑且首肯久之歸以語幕中諸友亦無不解頤者他日復遇其言云爾余謂此非戲論乃痛語也百物旣已騰貴士人亦何以營生此物有不日賤者乎淵明乞食詩云飢來驅我去不知竟何之行行至斯里叩門拙言詞以靖節之高風猶云爾而君乃強項如是殆加於古人一等矣勛哉其務始終書之以爲君笑且以當恭頌某年月日同學蔣汾功書

跋趙襄忠公奏疏存稿後

故勇畧將軍趙襄忠公奏疏存稿凡若干篇自次之爲八卷刻於浙中公長子兵部尙書宏燦爲後序歲久流漫尙書子今刑部郎中之垣復繕寫之屬其友武進楊椿書於卷尾竊惟襄忠公結髮從戎馳驅外內五十餘年其勲烈奇偉固已銘太常而書國史而眷遇之厚優恤之隆有非他將所可及者昔漢馬援

五齋堂文集卷三
事光武帝每有所謀未嘗不用其後南征交趾不免
薏苡之謗唐尉遲敬德勇武絕倫爲凌烟閣功臣然
侍晏慶善太宗譙讓者數焉襄忠公一心報國不肯
事長者家兒似馬伏波慷慨果毅見羣臣短長必面
折廷諍似尉遲敬德卒之讒毀百端悉蒙昭雪較二
臣之遇殆遠過之蓋讀公瀝血陳情之疏明白回覆
之奏未嘗不感慨流涕也康熙五十八年某月某日
武進楊椿謹跋

保素堂詩集序

保素堂詩集若干卷父友翰林院侍講學士華亭錢

先生之所作也先生諱金甫字越江與先大夫同登
康熙十八年進士同官翰林先生子長涵又先大夫
長女壻也以故兩家交最密先生在翰林時三逆初
平海外琉球殲北俄羅斯喀爾喀諸國咸內附

仁皇帝勤求政理樂育天下之材暇則與諸儒臣講
論典籍而先生與先大夫尤以文學被知遇每朝罷
四方士過從請益無虛日先大夫性明淡輒獎拔其
所知而先生闊達愛客有鄭當時孔文舉之風焉先
生嘗因飲作詩云余飲汎愛不擇人楊郎孤介邈難
匹貴官相召常堅辭生客相逢便稱疾先大夫詩云

燕市誰哉號酒人髯公意態較能真怕於座上逢生
客喜在天涯作比鄰其兩相傾倒蓋如此壬申夏先
生卒於官先大夫哭之慟後過先生之廬及遇故時
賓客語及先生未嘗不愴然也庚寅冬先大夫乞假
家居長涵奉先生詩請序先大夫先大夫諾之而未
暇爲也後六年先大夫卽世今年春椿與長涵胥會
京師長涵謂椿曰涵梓先學士詩將竣矣願子序之
以紹兩先人之志椿謝不敏而長涵請之再三椿念
先生之歿已四十年先大夫歿一十有七年矣同時
賓客往來兩家者亦多已物故惟今禮部尙書嘉善

錢公兵部尙書吾縣唐公前知盩厔縣事青浦呂公
三人在耳而椿與長涵髮亦俱已種種俯仰今昔不
覺泣然因執筆而書其後時雍正九年秋七月辛未
日也年姻家子武進楊椿

菰米山房詩鈔序

吾師蔣弱六先生菰米山房詩鈔若干卷先生孫惟
梅所輯也先生年二十餘卽授徒於外其在先大夫
家塾最久康熙庚申歲伯兄祖榮仲兄梅同執經於
先生椿方五齡時從旁竊聽先生以爲可教己巳庚
午間椿與四弟祖楫五弟祖耜始受業焉先生寬而

肅嚴而不苛於諸弟子督課之爲嚴師長育之也不
啻如賢父兄以故弟子成就者衆人人願出先生門
下先生久而欲去也則相率留之留之不得則雖稍
緩須臾母去以爲幸去則思念之愈久而愈不能忘
雖其父兄之情亦皆然先生自幼與先大夫莫逆在
塾時相得尤甚而先生誨椿兄弟視他弟子爲厚見
於吟詠者亦獨多辛未秋先生下第還留別都中親
友細憶年來歌哭處秋風秋草總關情自言此爲學
徒而設先大夫和云此日不禁子淚落三年實望子
成名主賓師弟之情可見矣丁丑春先生會試復至

示椿兄弟滿鏡風塵殘鬢髮小樓燈火舊因緣小樓
先大夫寓中天遠樓先生授經處也先大夫辛未和
先生詩只是頻年相聚慣從今誰共坐樓頭卽此樓
矣庚辰歲先生課六弟松喬從子紹曾復於此將歸
有句云三庚憑一榻臨別只依依椿兄弟七人七弟
豐貽生最後不及游先生之門其六皆先生弟子也
而紹曾以弟子之子亦預列焉先生後家居或館於
他所率不久輒見見則獎掖開發一如往課業時也
戊戌椿殿試北上先生教諭懷寧適假歸里中贈椿
云唱驪拂拂好春風那能尙記相思苦其年椿與四

弟同官於朝常書問起居不復克再見先生矣庚子秋四弟卒先生在懷寧哭之云白髮窮途淚誰知到汝身清秋無好事竟日慟斯人越三年壬寅先生以老乞歸其冬先生亦捐館舍矣昨歲惟梅以書來屬先生詩序於椿未幾惟梅歿惟梅之子崇烈復以請憶椿初受業時年一十有四先生以國士器之今先生亡已三十年先大夫歿三十有七年椿兄弟及門者皆後先卽世椿耄及無知暮成何望欲如曩昔父師兄弟同在一堂之上邈不可得敬述先生之教并先生詩之爲椿父子兄弟作者語言如昨不禁死生聚散之感尤不勝自棄之懼焉己乾隆十六年歲在辛未秋七月丙子上距康熙辛未己六十年同里七十六歲弟子楊椿謹序

濟寧州杜祠詩序

濟寧州杜子美祠堂巡漕御史仁和沈君之所建也州故有南池子美嘗與任城許主簿同游於此池湮而址尙存州人作堂其上乾隆九年君巡漕至州館焉喟曰斯堂之建非因子美舊游乎愛其地而不祀其人可哉卽堂之寢肖子美像祀之配以許主簿十二年冬君復來視漕見其垣有侈剝者榱桷有朽缺

者改建於故祠之東既成君自爲之記四方能詩者相屬而歌之凡得古今詩若干首君以書來俾余爲序余惟子美忠君愛國悲天憫人之見於詩者昔賢論之詳矣其敦倫念舊真摯纏綿亦有非他詩人可擬者則其興起百世祠而祀之也宜若主簿卑官耳許君者今亦不知何名乃以與子美同游千有餘年之後配享子美於茲池之上寧非其幸歟則士之一出處一進退可不慎其所與歟君之此舉蓋非僅仰子美高風所以訓勵後人者至矣宜諸君子樂爲之詠也乾隆戊辰春武進楊椿序

過浙吟序

過浙吟者伯兄茂實先生昨歲至南昌過浙中之所作也兄方過浙時椿實偕行於時天氣澄清長江如練兄每遇風景佳處輒賦古律歌詩有湯子銘新者同里人也亦同在舟中言曰某往見子久富春圖竊謂山川之勝乃至於此今先生工於吟詠將富春山水未辨屬詩與畫耳余曰子久富春圖自謂風雨晦明醉醒憂喜偶然有得涉筆爲之蓋積十五年乃就吾兄自丁卯冬往來兩浙至是二十餘年過富春者屢矣四時早暮山川變幻之情狀感憤憂思悲傷愉

佚可喜可愕之境莫不於詩發之則謂子久之畫畫
中有詩吾兄之詩詩中有畫奚不可者兄既赴南昌
余留西安者三月每登高望遠回思舟中笑語愀然
不怡者久之頃閱兄別後諸作不啻讀子瞻鄭州馬
上詩也抑余歲暮東歸雪花撩亂舟行如在蓬萊方
丈間念古人有云天地皆白玉合成使人心瞻澄澈
因詠五言詩數首愧其詞劣不足盡山川之勝而兄
之未值此景爲可惜也康熙庚寅二月二日

送徐編修出使流求序

康熙五十七年

上允流求請命翰林院檢討海君寶編修徐君葆光
往使其國立世曾孫尙敬爲中山王一時士大夫相
屬爲詩文以大其事編修之友武進楊椿亦爲文進
於君曰流求自梁陳前未通中國隋大業元至元大
德間嘗命將出師卒不得其要領宋淳熙時且入泉
州水灣爲邊患明太祖旣平天下遣行人楊載招來
遠人中山山北山南之使始至蓋服之如此之難也
我

國家未勤遠畧聲教所訖東南小大諸邦咸受正朔
而流求率先內附其其職尤謹竊聞之海夷隸職方

者時候風潮朝貢去來或荒忽無常率一再封輒中絕今

上二十年以流求道險遠禮官嘗議罷其使矣陪臣毛見龍梁邦翰陳乞再三

天子亦重違之不忍驟罷蓋自元年張給事學禮所封今世曾孫之高祖二十一年汪檢討楫往使則其曾大父也六十年間歷其高曾元五世

聖天子久於其道不冒海隅出日豈近古所得擬哉方給事之歸也稱其文史頗廣惜未華言譯之而檢討復

命國王尙貞附奏願遣陪臣子弟入國子監讀書上可之二十五年其國梁成楫阮維新蔡文溥等來京學七年而後歸昔明嘉靖前遠夷士子入學成均惟流求爲最久後止不行者幾百年今此邦陪隸得近

天子之光歸揚一道同風之盛二紀餘矣宜其漸被涵濡人才實盛有遠出故明時上者抑其國舊無賦斂有事則均稅產少珍奇商賈不至故民俗樸純無浮僞囂陵之習近海東諸國製作工巧特未知中山於古所云何如大雅曰夙夜匪解虔共爾位朕命不

易周頌曰無封靡于爾邦維王其崇之願君爲嗣封
告焉

送胡玉泉程九峯之四川軍營序

大金川負岨爲固侵我屬夷窺我邊境

天子赫然命六師征之二載矣今年冬以保和殿大
學士傅公爲川陝總督經畧軍事傅公請順天府府
丞胡君內閣中書舍人程君同行
天子允之椿惟自古邳隆之世用兵西北者多矣西
南則虞之有苗殷之鬼方爲最著蓋西南多嶺阨非
若西北塞外曠野平原可車驟馬馳也亦非若中原

之山可乘櫟行也其人各處巖穴自爲君長又非若
西北諸部有渠率有偏裨控弦之士數萬或數十萬
也故諸夷不敢輕肆中國哀師伐之者亦少其義蓋
羈縻勿絕而已今金川人衆不能當中國一大縣受
圍以來困窮已極然尙未稽首來庭者則以地至險
其人跳踉便捷我軍未能與之追逐上下也亦非臨
衝鉤援可伐之者也計惟還師境上以逸待勞用明
高惟善策屯田巖州雜道間則內省費外有守禦之
備策之善者也夫背畔之人必有同惡西南夷種頗
衆大金川酋又甚黠其解仇結約交質詛盟非一日

正齋堂文集卷十三
三
矣寧無一二同謀者特畏

聖天子之威不敢顯與之比耳宜乘其未著多其間
謀以攜之厚其錫賚以勞之逆酋勢孤力弱有不生
致

闕下者哉古之善用兵者役不再籍糧不三載取用
於國因糧於敵故軍食常足今軍營轉餉悉役屬夷
夫編氓久於轉運尙有逃亡之患况屬夷乎明成祖
自將北伐以高爵厚賞之三衛尙敢畧其厚重况土
目乎有如兵久不決逆酋威劫小種啖以微利黨合
交堅猝有意外之變所憂者非獨大金川矣且大金

川要塞非我軍所悉知也逆酋萬一與諸夷約佯爲
敗北誘我深入或扼其前或守其後要我饒道逆我
顏行豈不重可憂耶四川多孰夷成都爲省會亦有
挈家來居者今驅之不可留之不宜得毋有當豫防
者乎殷高宗伐鬼方三年克之虞廷舞干羽僅七旬
耳夫惟不以三旬逆命爲嫌故能致七旬之來格舜
禹邁高宗者此也今

天子勇智天錫傅公忠而善謀又得二君爲左右吾
知大金川殄滅不久矣於二君之行書以贈之

送吳雨臯之任偃師序

偃師古畿縣其山川雄秀風俗樸淳有先王之遺焉
吾表弟吳雨臯學醇而行修嘗應博學鴻詞舉又屢
試順天不得今年冬以史館勞出爲丞茲邑京師士
大夫知雨臯者咸爲雨臯惜余告之曰明道先生不
云乎一命已上苟存心愛物於人必有所濟况司牧
乎一縣中民之待治者以千萬數其事靡所不有主
之者令也佐之者丞也吾得以行吾志耶毋輕興利
興利適所以生害毋輕除弊除弊適所以長姦毋矜
人所不能爲毋謀己所不當爲吾不得行吾志耶吾
力之所及吾勉之吾力之所不及吾志之毋誘人以
自逸也毋毀人以自賢也其要在盡吾心盡吾職而
已矣名譽不必先唯實爲之急業不必其廣唯期其
有益於民雨臯勉乎哉素位以務民之事他日伊洛
間有廩廩德讓君子追古人而籥之者必雨臯也吾
將執筆俟之矣雨臯勉乎哉迂農楊椿序

送石谷王山人序

代

吳中數十年來以畫著名者二人常熟王子石谷武
進惲子南田南田爲遜庵先生之子與余總角交而
石谷則家在烏目山中去余鄉二百餘里順治甲午
乙未間余從先大夫至姑蘇識石谷於吳下嗣後先

伯兄築東臯書屋延南田石谷相繼居之余每觀二人烘染皴皴窮工盡意未嘗不心善之也自是以來二人之藝益精四方名士持縑素請者足相躡於二人之門蓋石谷以山水南田以寫生擅名不同而其神妙精遠奪天巧而盡人工則一也康熙庚午故大學士文恪宋公之子今工部郎中駿業奏請繪

南巡圖乃以幣迎石谷館之於家於時江左善畫者皆在而南田則已先一年卽世不及與其事矣後三歲圖成上善之

皇太子召見石谷於別殿慰問移時手書山水清暉四字賜之人莫不爲石谷幸某因思士大夫遭際承平

天子嚮學

東宮而下皆重文墨而尙德行山林隱逸之士亦得逞一日之長而蒙

睿書之賜則士之生其時者寧復有不遇之嘆哉顧其間亦有不幸如南田者其翰墨不爲後人而乃天齋之年不得與石谷同一日之遇也豈非其命乎往時南田之死一子尙幼石谷親至其家發南田篋中

孟鄰堂文鈔卷之十三
稿本爲整理而封識之留以遺其後人夫人善於自見各以所長相輕所短未有不交相忌者而石谷之於南田獨能如此則非特藝事之成而其不忮之德亦非他人所能及也於是石谷將歸徧請縉紳先生以求詠歌其事凡得敘詩百有餘篇而余與石谷游最久故爲之說以贈石谷視之其益慨然於南田也夫

孟鄰堂文鈔卷之十三

孟鄰堂文鈔卷之十四

武進楊椿農先氏著

曾孫魯生校字

關西書院碑

通議大夫分守潼商道陝西布政使司叅政桐城張君視事之九年百務具修民吏和洽君之友武進楊椿以使事至潼關入其境士子恂恂如也進退語默秩秩如也過書院讀誦之聲朗朗程業肅肅如也曰異哉吾聞潼關俗尙武奚一變至是耶君曰潼關舊爲衛故民多好勇士之能文者鮮

世宗憲皇帝詔改爲縣置學官生員與他州縣等而

正瑗承乏適當其時謀所以祇承者竊思四大書院之設在宋至道祥符前昔人謂未有州縣學先有鄉學是也其後州縣學既建書院仍不廢土田之錫教養之規最爲美善宋元人材往往由此而出正瑗仿其制創爲書院名曰關西集邑之俊彥讀書其中既又思孔子爲萬世師州縣學皆祀之矣然孔子之不可及猶天之不可階而升數千載間願學者孟子一人而已矧世之凡民耶惟縣之先哲或名賢宦於是者其時近其事詳則學之庶可幾耳而潼關先哲舊志無所見其宦於是者則有若前副使睢州湯公斌

曲阜孔公興鈺均惠澤及民而湯公文學德行尤一代所景仰故祀之俾縣人知所矜式而正瑗朔望行禮親與諸生講業焉工肇於雍正丁未冬訖己酉秋其貲費正瑗以俸金爲之歷三年而始成又五年憲皇帝詔天下立書院又一年命祀湯公於賢良祠關中人士信茲舉之不謬益奮迅鼓舞思以二公爲師迄於今諸士子業日益進行日益修誠如吾子所見聞蓋

聖天子作人雅化而二公流風抑亦有感之也願吾子書其事於麗牲之碑俾後之司土者考焉君字引

除號方齋學問淵博爲人表裏洞達見理明而爲義
勇類如此復系以詩詩曰

自昔文武本爲一途後世歧之視爲異趨惟我張君
達治之本祇承

上意教育懇懇爰建書院在學之東中祀名宦湯孔
二公猗歟湯公有用有體古稱三立庶幾無愧孔公
聖裔質有其文慈祥愷悌遺愛在民君並祀之多士
景從君時至止跪拜雍雍君時講論氣度沖沖多士
化之式和爾容以革爾心以協厥中人亦有言糾糾
之武提旛擊鼓躍馬操戈惟勇力是怙烏可言武亦

有懦夫佔俾咿唔舉華摘英惟文字是娛烏可言儒
惟忠惟信惟禮惟義斯甲冑干櫓文武攸備我爲茲
詩道君之意以勸多士無溺乃武藝無流乃文弊華
山巉巉河水潺潺勒辭於石用昭無斁

完顏氏家廟碑

資政大夫 經筵講官知 起居注通政使司通政
使兼詹事府詹事署理翰林院掌院學士事完顏公
留保嘗與椿偕朝道與椿曰先大夫營家廟於居室
之東歲時祀先祖給事公以上凡若干楹迄今數十
年矣留保將重新之大懼無以稱先人之烈惟是廟

必有碑願子之爲留保文之也謹按完顏氏出金後
有隆萬杭愛者以智勇雄其部人七傳至諱魯克素
學士之高祖也借子諱達齊哈事

太祖高皇帝

太宗文皇帝於盛京達齊哈官正黃旗內府佐領兼
管遼漢人都督生諱阿什坦從

世祖章皇帝入關舉順治九年進士官刑科給事中
生諱鄂素學士之父也官內務府慎刑司掌印郎中
功庸咸在國史學士康熙六十年進士由翰林院庶
吉士歷今官事

聖祖仁皇帝暨今

皇帝以忠謹受知蓋完顏氏自 國朝以來累世通
顯並有令德考之禮大夫三廟干祿及其高祖合族
以食序以昭穆今學士葺茲新廟於古尊祖收族之
義甚合完顏氏可謂善述善繼克世其家者矣敬條
其族所自出及名位世次而繫以詩詩曰

完顏之先系出有金代居長白黑水之溇偉哉隆公
殺虎惟百肖圖祀之英姿颯颯魯公應運沉毅而雄
長戈大戟躍雲拏風達公矯矯兄弟戎行如漢耿氏
如元史張猗歟給事盛世之儒惟我郎中忠孝有餘

以政于家給事肅肅郎中繼之庭幃雖睦以勤于邦
給事業業郎中繼之恪謹有緝古惟大宗收族以仁
給事愀焉念我族人豈無憂恤而祿不逮我飲爾緡
勿虞爾匱禮於大夫立廟有制郎中曰吁我則備位
而祭勿時孝於何伸一堂四室其禮之遵仁以敦族
孝以奉先既仁且孝於利後人乃生學士

天子是倚出納

皇言瀛洲承軌公間謂人我德則涼匪先人澤業於
奚昌瞻彼寢廟我考營之泊於小子其塗墍茨迺值
其宮于桷于楹迺備其器惟籩惟鉶秋霜既降春露

載零烝烝孝子來拜廟庭酒馨于尊肉登于俎有簋
粉醢有敦白黍伊我諸父我弟我昆我祖之後咸來
駿奔或卑爾奠或嘏爾辭利成既告于我燕私貂冕
峩峩黃髮皤皤旅酬交錯笑言孔多惟木苞根水澄
于淵矧我族姓敢忘本源其繼自今苾苾芬芬欣我
祖考以式子孫嚴牲有石斯鐫斯刻傳之有久永永
無斁

德門壽母墓碑

德門壽母故順天府大城縣學教諭贈資政大夫刑
部右侍郎黃公諱華蕃之妻山東布政使司布政使

孟齋堂文金卷十四
前吏部左侍郎巡撫浙江都察院右副都御史叔琳
廣西布政使司布政使叔琬江南寧國府知府叔琪
督理河南驛鹽糧務分守開歸道按察使司僉事叔
璫直隸正定府行唐縣學教諭叔瑄之母也姓吳氏
父諱某母鍾氏夫人年十九歸於黃歸七十四年年
九十有二乾隆四年冬十二月辛丑薨於京師里第
明年秋七月壬辰叔琳等奉夫人櫬祔葬宛平縣南
下莊韓山贈資政公之兆先期來請曰古賢媛事託
於碑刻者多矣吾母雍正間嘗受

憲皇帝德門壽母之褒今將列諸隧道以顯詔之敢
以爲請椿不敢辭銘曰

吳出宗周世家於杭自夫人父來遷

帝京是生夫人肅恭端靜曰嬪于黃順得其正祖姑
見之謂婦也良克昌我後俾熾俾臧贈公秉鐸恆山
之麓夫人從行中饋攸屬諸子留京大父傳之拊之
鞠之課之督之篝燈午夜猶時勛之

皇策多士歲在協洽夫人長子名書一甲僉曰休哉
伊祖貽翼祖曰何哉子婦之力余課諸孫嚴過厥師
婦少姑息教將焉施我盡我教子成子名子兮有母
我志斯承惟時諸子咸克敬遜鄂不光光弟兄進進

孟鄰堂文錄 卷十四
其下諸孫緝緝熊熊或舉京兆或捷南宮往昔燕山
五龍惟寶夫人之子輝映先後古稱元愷其族十六
夫人之孫何誇裴陸

三朝寵命夫人受之副笄揄狄夫人授之雍正之元
少宰承

恩德門壽母有錫自

天龍盤五爪

天家所用盛以木瓜

天子之供

天子曰琳汝子丞弼歸奉爾親以究爾績琳拜稽首

對揚

皇休受茲介福於古有不琳與諸弟宣力

王家鳴騶繡斧大旆高牙浙水西東大河南北海岱
之間邕桂之域布愷行仁導揚

皇德子惠我民外暨蠻楚朔南萬里願然一聲是母
是子小民之慶夫人於時家園容裔秋月春花孫曾
環侍有劍有負有保有攜含飴餽果其樂怡怡人見
夫人顯榮壽考福履之崇得天孔厚豈知夫人百年
身世往復平陂履之匪易方其初歸家故屢空夫人
坦坦不爲境窮竭誠晨夕進厥甘旨退而自食半菽

而已迨其中年子登朝著諸孫踵係盛滿是懼不震
不驚不矜不盈翹翹仙仙臨深履冰追念先公歿逾
卅年施德未食裕我後昆每遇賓媼盈門來賀夫人
靜居悄焉神痺歲時饋食耄耄增虔操家整肅門內
秩然笑不啟齒聲不出戶兼味不陳輕暖不御伊古
有訓內言不出夫人生平言皆可述善不在小亦不
在大務其在我母爲兩可理既由命位亦前定順吾
之素母爲他慕以和其心以淑其身壽考且寧以牖
我子孫韓山之原有鬱者阡我爲茲銘女史之徵

河源記

河源在京師西南七千六百餘里西寧塞外一千四
百五十五里其地羣山環繞山不甚峻而地勢甚高
土石黑色蒙古槩名爲枯爾坤一作庫爾棍饒水草產金

銀礦疑卽唐書之崑崙吐蕃名悶摩黎劉元鼎謂之

紫山者也其間可三百餘里有泉千百泓隨處湧出

登高望之燦如列星蒙古名敖敦塔拉一作鄂敦他拉疑卽

唐侯君集任城王道宗所次星宿川元都實謂火敦

腦兒者也其西南三百餘里有三泉出阿拉巴顏喀

喇達巴罕東麓一無阿拉二字達巴罕者嶺也疑卽

君集道宗過星宿川所望之積石山也其水東流合

為一與烏哈那哈達之水合一作那哈達者山峯也又

東北與西拉薩拖羅海之水合南與拉母拖羅海之

水合拖羅海者峯頭也又東與七根鄂模合鄂模者

池也又東名阿爾坦必拉必拉者河也疑即君集道

宗望積石山所觀之河源也又東北匯於敖敦搭拉

番人名古爾板索爾馬一作古兒班索而嘛又作古

羅華言河源也又東北北會巴拉波哈阿林之水巴

波哈一作巴爾布南會哈拉阿達勒克阿林之水哈

阿達勒克一作阿林者山也又東南注於查靈鄂模

喀喇阿答爾罕一作廣二百餘里其色白又東北注於鄂倫

查靈一作查倫又作扎陵

鄂模鄂倫一作鄂靈又周三百餘里其色青二鄂模

相距五十餘里疑即都實言匯二巨澤名阿喇腦兒

者矣蒙古自此名喀屯必拉東南流薩喀勒拉克阿

林之水會色納楚必拉多必拉自西南注之苦克差

鄂模差一作查自東南注之又東南喀喇必拉喀喇一作入

焉又東北西白土必拉合東南五十餘泉注之又東

南敖博圖噶順鄂模敖一作鄂注之又東南多母達噶順

鄂模注之又東南查哈噶順鄂模查哈一作插漢注之又東

南敖羅海鄂模自東北注之又東南呼藍必拉會枯

得勒古必拉枯得勒古一作吉得兒古盛吞鄂模盛吞一作魁屯自西北

注之又東南博尺圖必拉入焉又東南哈嘛古兒太

必拉入焉又東南經巴顏圖渾達巴罕又南厄得靈

忒得靈鄂模注之又南厄魯克必拉入焉又南哈爾

濟必拉哈爾濟一作哈爾吉又作哈爾給入焉又南薩克必拉入焉

其前水皆綠色至此漸變而黃矣又東南多爾吞必

拉入焉又東南經阿木你麻禪母孫阿林南麻禪一作馬禪

又作麻纏又作馬纏又作馬勒產其山縣互三百餘里上有九峯高

入雲霧中峯亭然獨出百里外即望見之積雪不消

冷瘴甚厲疑即唐魏王泰張守節李吉甫所稱大積

石元都實謂之大雪山又謂之騰乞里塔潘昂霄名

為崑崙者也自此循山東流燈必拉自西北入焉巴

爾火必拉自西南入焉又東南哈拉必拉入焉又東

南巴薩罕拉必拉自西北入焉拜多必拉自西南入

焉又東南巴里馬必拉入焉又東北衣克薩勒必拉

入焉又東北他哈拉馬克必拉入焉又東烏捏必拉

入焉又東南布哈必拉入焉又東北西拉必拉入焉

又東南衣克巴爾和必拉入焉又東巴哈巴爾和必

拉入焉又東北經烏藍莽乃阿林西南莽乃一德忒作芒柰

查哈崑多倫必拉注之一無查哈二字又東經烏藍莽乃阿

林南多母打禿崑多倫必拉注之打禿一作達土又東經烏

林南多母打禿崑多倫必拉注之

林南多母打禿崑多倫必拉注之

林南多母打禿崑多倫必拉注之

藍莽乃阿林東多拉崑多倫必拉注之多拉一作多洛○三崑多

倫俱作崑都倫疑卽都實言納鄰哈刺乞兒馬出鵬撈三河

矣又北經烏藍莽乃阿林北折而西受南北數十小

水又西北巴罕哈留圖必拉罕一作漢留一作柳會伊克沙喇

圖達巴罕之水又會西喇達巴罕之水自東北注之

又西北受十餘水又西北哈拉必拉入焉又西北衣

克哈留圖必拉衣一作伊留一作柳會那母哈阿林那母一作納莫烏

藍俄羅濟達巴罕羅濟一作爾吉當布庫忒兒三水自東南

注之又西北色普隆必拉入焉又西北歸隆必拉入

焉又西北齊普必拉會圖聲圖必拉得羅敦必拉得羅

敦作得爾多滂馬阿林哈爾濟達巴罕濟一作吉諸水自阿木

你麻禪母孫阿林東注之又西北呼呼烏蘇必拉北

會西拉哈普七海必拉西拉哈普七海一作薩爾哈卜齊海阿爾昂必

拉昂一作坦南會因達必拉因達一作密喇察普楚阿林之水自

阿木你麻禪母孫阿林西注之折而東北哈堯圖必

拉哈一作哈西南會衣克圖羅根阿林之水東南會衣使

克阿林之水衣使一作伊西又東南會巴罕土魯根阿林之

水巴罕一作巴漢魯一作圖爾自東南注之又東北盪吞西里克

舍利盪吞一作魁屯會袞俄羅濟必拉羅濟一作爾吉自西北注之

舍利者泉也又東蘇勒古兒必拉會數水注之又東

北烏藍必拉會打城達巴罕打城一作大成諸水自東南注

之又東北經歸德堡元之貴德州明歸德守禦千戶

所也水至此始名黃河又東北枯枯寨必拉入焉又

東北火涿藍太必拉入焉又東北西納鄂模會烏藍

布拉克必拉自西北注之又東北也巧雀匣必拉入

焉又東南姑楚必拉入焉又東北經積石山南而入

陝西河州塞蓋即唐人所稱小積石以西有大積石

故此稱小也竊惟河源不見於經出本紀山海經諸

說妄已漢時言之者自張騫始然止蔥嶺于闐兩源

未言星宿海也其後唐有劉元鼎元有都實明有釋

宗泐言皆異而都實之志為詳然止言星宿海未言

其西尚有源也

本朝康熙間

聖祖仁皇帝屢遣朝臣出使西域準天度以測地理

始知敖敦塔拉西有阿爾坦必拉其源視元史更遠

其至京師道里則視元史較近椿嘗逮事

仁皇帝伏見我

仁皇帝開方以計里測極以準度於中外山川名號

古今互異番漢不同者必詳考圖籍廣詢方言務得

其正俾傳信於後用能四極同文八方向化椿前在

孟齋堂文集 卷十四
史館三十餘年得預編纂之役今老矣追憶曩時聞見恭撰河源記一篇以

皇輿圖爲主質之冊說叅以奉使諸臣所錄其譯文音有假借有轉注字有多少者附註之稱名異而義可知如山爲阿林河爲必拉者仍而釋之前史所載名賢所論有可援證者引之總以著

大朝盛治無遠弗屆

聖天子好古敏求嘉惠天下後世之至意云爾乾隆十七年夏六月甲辰前史官楊椿謹記

附
讀河源記書後

河源記記河之源所自始也不窮其源所自始而曰源於是焉可乎元人都實之志尙矣自

本朝皇輿圖出而河始無匿源農先生衍之爲記得千五百餘言而古來誌載河源其離合疑似者胥無匿形矣豐幸得受讀焉而窺其要其言自大雪山而西河所會與衆水之注於河其可名者凡二十有九自大雪山而東水之注河暨合河而流可名者四十有四類多元志所未詳而先生按圖以次之者也其不得以某水名而交流注河者亦必臚及焉而其尤妙爲證悟者則據唐書吐谷渾傳合之今之輿圖

而知崑崙實在河源之東星宿川尚非河源所自始
于古翳蒙豁焉開露功其偉矣乎然猶若疑其辭者
則以未嘗躬涉其地特據冊指詳之疑以傳疑蓋其
慎也是即先生之史裁也抑又考之唐書吐谷渾傳
侯君集達栢海望積石以觀河源不知栢海即記中
所云西拉薩拖羅海諸水否也李靖破伏允督諸軍
經積石山河源至且末且末近於寘不知即記中敖
敦塔拉旁近否也薛萬均萬徹敗天柱王於赤海不
知即都實所云赤賓河記中所云喀拉必屯以下諸
水否也劉元鼎謂紫山直大洋同國不知即地理今
釋所云巴顏喀拉山記中所云枯爾坤之地否也班
書西域志河有兩源一出蔥嶺一出于闐其言或可
參覈唐書直以紫山當崑崙未審何據要之崑崙在
河源之東無疑而郭璞酈道元之所未詳明人宗泐
王鏊諸人所疑駁均可無論矣豐不敏於河源諸圖
志多未涉目其敢妄有陳於先生立言之外姑就簡
末贅數語以誌一時之嚮往云乾隆十八年上巳前
三日外甥儲兆豐謹書

江源記

江源有三在番界黃河西巴顏哈拉嶺七七勒哈納

者番名岷捏撮岷江之源也在達賴喇嘛東北乳牛
山者番名烏捏烏蘇金沙江之源也在呼胡諾爾哈
木界馬兒雜兒柰山者鴉龍江之源也岷江自番界
逕浪架嶺南流者爲正支其東支自弓橫口至漳臘
營合焉西支自殺虎塘至黃勝關亦合焉逕四川松
潘衛西又南逕長寧堡又東南逕茂州西又西南逕
灌縣城南分爲十餘水遶成都府西至新津縣南合
爲一又南逕嘉定府城東又逕敘州府城東南與金
沙江會金沙江一名阿克達母必拉必拉者河也逕
母魯烏蘇之拜圖渾名母魯烏蘇又逕巴塘名巴除

又逕裏雍河屯名金沙江又逕喀木又逕中甸又逕
塔城關又逕雲南麗江府名麗江其南岸則鶴慶府
又東南逕永北府土順州西其南岸則大理府姚安
府又東逕四川寧遠府之紅卜苴與鴉龍江會鴉龍
江其源在青海南有泉百餘平地湧出西番名以查
楚必拉蒙古名以七察爾哈瑚匯爲一大川名雜麻
木特河逕裏塘納東西大水十餘名鴉龍江逕打箭
爐之米尼雅克山名米尼雅克除又逕占對安撫司
西又逕喇滾安撫司西又逕鹽源縣名打沖河又逕
紅卜苴與金沙江會其河內屬四川河外屬達賴喇

麻又東逕武定府北其北岸則會理州折而北逕東川府西又逕昭通府西其西岸則西昌縣又逕馬湖府城馬湖江入之名馬湖江又逕敘州府城與岷江會自此東南流逕四川湖北江西安徽江蘇五布政司地幾七千餘里至鎮洋縣入於海明天啟中江陰徐宏祖字霞客嘗至西番還抵峨眉山下撰溯江紀源又撰江源考幾數萬言其書大抵以金沙江爲源德清胡氏朏明力詆之康熙五十七年椿初入史館館師常熟蔣漱芳先生以聖祖仁皇帝所賜

皇輿圖見示旣又伏讀

御製文集又得桑格所撰奉使錄觀之乃知金沙江之源至敘州府六千九百餘里鴉龍江之源至紅卜苴三千四百里又一千六百里至敘州府而岷江之源至敘州府祇一千六百里耳則言江源自當以金沙爲主而禹貢導江但言岷山不言金沙鴉龍者以岷山在五服內金沙鴉龍之源在五服外也漢書地理志蜀郡湔氐道禹貢岷山在西徼外江水所出蓋亦知江水源於徼外而未窮其所在又泥禹貢岷山之文故謂岷山在徼外也若僅今陝西四川番界之

岷山則漢嘗郡縣其地矣烏得謂西徼外乎夫窮河源者漢以來不一人而江源則未有朝使究之者我朝貢譯訖於西戎
聖祖仁皇帝好學之勤下問之切故兼得江河之源而
諭旨所頒樂與人同之意尤遠邁往古椿敬案之圖錄撮其大槩恭記之如右而徐霞客以貧老布衣擔簦躡躑遠涉萬里之外身歿百餘年其言始徵信於聖世士之遭際遠近固有時乎附著之母使蒙不學無識大言欺人之惡名焉

楚雄府定邊縣學記

余少讀孔氏書首言君子之學全矣次言孝弟而戒之以犯上惕之以巧令竊疑所謂學者精之天人性命高遠深微之旨而顯不遺乎聲明數度之文大之贊地參天而小存乎灑掃應對進退周旋之末至孝弟之良根乎天性宜無待於學而篇章次第似出記者之偶然及讀子夏氏之言曰事父母能竭其力事君能致其身與朋友交言而有信雖曰未學吾必謂之學矣孟子曰設爲庠序學校以教之皆所以明人倫也而後知明倫必本於學有斷然者今夫人之性

剛柔緩急不同而氣質因之而異鬻拳匡章之屬皆
幾幾乎犯上而溫良者過於柔順或巧言令色爲諧
臣爲媚子爲褻友聖人患之而教之以學去其剛柔
緩急之偏而納之忠信孝慈之正且倫者常也常之
變不可勝窮使不學處之則闇昧者必至於無術而
拘文牽義則又泥於古而不能適於今局於此而不
能達於彼聖人多學而識循循然博之以文使內克
己復禮而外行其強恕之方則事有百慮而通變者
無不宜理有萬殊而行權者無不可蓋大學中庸曾
子子思之所作也大學始於格物終於治平要不外

文王之敬止興孝弟慈之君子中庸推天命之謂性
極之上天之載無聲無臭而其實在行達道之達德
四未能之不敢不勉而已然則謂孝弟無關於學而
學別有所謂道者豈篤論歟定邊有學舊矣歲久傾
圮康熙戊子秋從子書來知縣事以俸所入及均平
出於里甲者擇日鳩工首建大成殿而講誦之堂棲
息之室各以次興葺又甃石爲臺闢地爲池立名宦
鄉賢二祠於櫺星門左右工旣訖功余適以事至教
諭常君欽天訓導楊君和邦及縣諸生某某輩請余
爲記余惟定邊在萬山中地窄而民樸無能文之士

可與他州縣匹者然其良知良能則一也故舉所聞告之俾知夫學者所以學爲子學爲弟學爲臣與友而克復強恕則其學之之道也自今令長師儒無荒遠茲邑而道之以躬行申之以訓辭諸士子亦無自荒遠而益凜聖人之教則禮可復恕可行化其氣質之偏泯其闇昧拘牽不難矣某年月日武進楊椿記

順德書院殘碑記

庚辰秋家君視學順德椿時隨侍左右出殘碑於書院之兒間碑廣二尺左長尺右不及尺者半余拭而視之得大字一十有四小字九十有七其字畫端勁

無立碑歲月然官爵姓名皆具余考之蓋金時物也按唐同光元年於邢州置安國軍節度元中統二年改州爲順德府今碑有安國軍節度官屬及邢州觀察判官教授則當在中統以前而碑所載姓氏其元起夾谷阿魯僕散忽失三人今皆不可考矣唯馬知微列於舊志爲金教授又舊志承安五年高有鄰爲安國軍節度而此碑有云時承安又云節使高公留題壁間則其在承安後無疑也當承安時宋使通和元兵未起守土者相與極游觀之樂以託於務本重農之意而後人覽其遺蹟因爲立碑於此未可知也

孟齋堂文金卷十四
嗟夫數人者其立碑始末皆已湮沒而無存所可見者唯此百餘字而已豈以其詞之殘缺而廢也因爲考其時世而置之於壁間焉

雲溪草堂圖記

雲溪草堂同邑辛齋徐先生讀書處也辛齋自年十三四時父副都公歿於京師母潘淑人築室白雲溪之上故居之旁顏曰春暉堂命辛齋讀書其中卽今草堂是也淑人教子甚嚴肅有河東韓夫人風而辛齋能自樹立卒成母氏之志今副都亡二十有六年淑人歿亦五載餘矣而辛齋思慕不釋一日出其草

堂圖請友人楊子記之余惟思干之詩美宮室也首章言兄弟之相好末章言子孫之衆多其次章曰似續妣祖築室百堵西南其戶蓋仁人孝子觸於目卽有不忍於心而况登其堂而爲所拮据捋茶者乎余故賦白雲詩五章以述辛齋之意詩曰

油油白雲在山之右有崇者堂自我父母雲之去兮胡不我留親之逝兮使我心憂

相彼乳燕尙巢于屋亦有慈烏咸集于木曾是人子而不如燕與烏生平舞勺孰使我孤

兒旣孤止母氏劬止爰立室家俾我居止母曰予小

子敢有不勤其艱其辛惟先公是遵
雞鳴各各機杼斯作讀誦朗朗明星有晃豈不愛厥
子夙夜不寧仙仙翬翬堂構庶以成
厥堂如之何兄弟是宜厥構如之何式穀是貽堂旣
安矣構亦新矣用長厥居慰我親矣

衢州府志小序

疆里圖

昔人有言州縣之設有時而更山川之形千古不易
故禹貢分州必以山川定其經界後世罷侯置守郡
邑屢更不能以山川紀者勢也衢當激水仙霞之會
漢唐而降建置州縣其疆域之大小道里之遠近前
志載之畧矣今取自明以來可考者列於左方若夫
東近金華西連饒信南接建寧北鄰黟歙固形勝之
區也東坡荊州詩云亦解觀形勝昇平不敢論後之
人念哉

山川圖

山之聚也川氣之導也自古辨疆域審形勢者必
以是制焉衢舊志於前代山川之事詳矣而文字缺
譌地名改易失其真者間亦有之又於山嶺險易川
流源委多所未悉今爲本之圖經詢之耆庶參以歷

孟齋堂文金卷十四
代傳記所載昔人言陵國變遷山河如故撫茲圖者
得不憮然而有感也乎

學宮圖

古之教者家有塾黨有庠術有序國有學三代以降
更盛迭衰我

國家崇儒右文學校之設徧於海內而衢爲浙東上
郡顧殿宇傾頽齋舍不備某心懼焉爰擇日命工以
次興葺今旣炳然改觀矣竊思前代宦於是者其於
學校可不爲勤焉而典籍殘缺紀載不全是可慨也
因考其可知者備列之如左

聖廟圖

某前在登州往來曲阜拜聖人之陵入廟堂瞻遺像
未嘗不歎聖澤之遠也比來衢州州於宋時爲輔郡
孔氏家廟今在焉祇謁之餘如登闕里其子姓在州
者咸斷斷有鄒魯之風昔明宏治中以宗子爲博士
與曲阜之裔並皆世襲迄今不替嗚呼豈非聖人遺
烈哉

府官表

余表歷代職官至於郡守未嘗不掩卷而嘆也嗟乎
彼其膺牧守之責豈不欲有施於時以傳於後而遠

或百年近或三四十年姓名輒湮沒無聞是可悲也而猶有幸而存者邑里不傳年代不著或爲邦人士所不識甚或鄙弗道若是者十蓋不免一二焉以其傳之之難而幸而傳者又如此其可慨也夫其尤可畏也夫而世尙有不欲施於時以傳於後者則又何也

縣官表

漢唐時郡曰太守曰刺史縣爲令長宋始有知州知縣之稱太守建自秦世至今幾二千載州建亦千一百年其能知州縣事不負其職者蓋有矣而五代前舊志多不載在縣爲尤甚余考史傳得其名可紀者備著之於表其事蹟卓異則見於列傳焉

學官表

今有秩甚輕而其任至重位甚卑而其事至難者非學官也哉漢唐郡縣文學掌以五經教授宋時務擇有德行者爲之

國朝選授請於

天子旣選命巡撫都御史考試然後任職蓋其慎也衢州自宋以來若曾鳳鄭伯謙程端禮柳貫胡翰之屬其文章事行已詳見史冊而流風餘韻有令人想

五洲堂文金卷十四
慕於百世之下者因次之爲學官表

庶官表

庶官佐府縣爲治梁陳前皆寮長辟署唐永徽初始
多注爲品官其未入品者亦選於吏部衢州若錢顓
陳師錫張奎諸人皆事業彪炳著於傳記士之賢者
洵不以官爲高下哉

戶口考

國家之制每歲郊天以天下戶口賦籍陳於臺下祭
畢收入內庫藏之其敬且嚴如此某側聞衢州在前
朝時戶口殷庶百姓家給人足康熙甲寅乙卯間耿

逆爲變百姓流離失所存者遂十不一二賴
天子撫循愛育生齒日繁四民各安其業今亦幾幾
有曩時之風矣管子曰倉廩實而知禮節衣食足而
知榮辱富教之任豈不在良有司哉

貢權考

衢山郡也每歲山上所出堇堇不足以更費故其民
務本而力作無奇麗紛華之習唐初任土作貢並以
官物充市後貢奉之額煩而征權之塗廣於是山設
銀鐵之場鄉置征商之務下至茶鹽酒醋莫不有稅
民滋病焉

本朝按畝徵輸著爲定令而前代非時之貢額外之征槩行蠲免豈不仁哉

郵政考

從來救荒之策有三曰倉儲曰賑卹曰蠲貸其見於周禮者遺人掌委積以備凶荒大司徒以荒政十有二聚萬民一曰散利二曰薄征是也我

天子愛養黔黎留心民瘼四方以水旱聞者卽下

詔蠲賑復時

敕常平之制顧衢在浙東最爲瘠郡一遇水旱歲輒不登昔宋淳熙中朱子奏衢州官吏檢放不實及擅支常平倉米狀云百度廢弛不成州郡有負朝廷子育元元救患卹災之意後之守土者其可不知所警哉

兵防考

三衢據浙江上游爲浙東要郡康熙甲寅乙卯間總督李文襄公駐師於衢賊所以不敢越西安而爭金嚴之地者文襄一人力也昔唐寶應初李光弼大破袁晁於衢州晁遂以平懿宗咸通元年裘甫作亂什將方景深拒險賊不得入然則戰守之際豈不以人哉余考兵制及古今戰守於文襄公事頗得其始末

因次之爲兵防考

藝文考

自古能言之士衆矣而篇章寥落往往不傳於後卽幸而傳矣而蟲鑿鼠嚙雨敗塵腐與夫兵戈水火終歸泯沒者何可勝數蓋以漢七畧唐四庫及宋崇文總目彼皆中秘之所藏尙不免補帷而塞漏也又况其下者哉衢自齊梁來文章顯者不少宋明時尤甚某至郡訪之不可得爲慨然久之夫諸君子當時其言之大者將以窮陰陽之運小亦自寫其性情孰知身歿之後飄零蹂藉名氏竟不得與書而俱存也可不惜哉今考郡人書目分爲四種且述其作書之意歐陽子云今著於篇有其名而無其書者十蓋五六也悲夫

忠義傳

余讀徐應秋爲父請卹疏未嘗不悲其志嗚呼可求可爲忠臣應秋可爲孝子矣方可求之死奢賊也遼瀋繼沒河南山陝間盜賊蠡起長吏棄城遁者何可勝數而可求以身死事鎮將道府以下隨死者七十餘人可不謂忠乎應秋懇懇三疏請卹忠賢擅政失而復得其賢孝又何如耶余來信安訪其家得應秋

遺疏因採其首篇又得明以來死事者若干人因并著爲忠義傳

方伎傳

司馬子長作扁鵲倉公龜策日者等傳范蔚宗倣爲方伎識者譏焉然觀周禮醫師繪人典庸占夢之屬皆隸於王官而近世郡縣亦有陰陽醫學傳曰德成而上藝成而下又曰士依於德游於藝然則方伎又曷可少哉又曷可少哉

列女傳

余閱舊志及古今傳記凡得郡中列女三百八十八人因總次爲列傳夫女子之傳難矣以余所聞明季及閩變時郡之以節著者尤衆而兵戈俶擾姓氏莫稽其得傳者特十之一耳則夫自明以前節烈之婦又豈盡於所志哉明季迄今逾六十年閩變亦三十年矣不卽論其存者又懼將泯沒而無聞故爲之傳俾後之傳列女者考焉

曾氏像贊三首

封安邑知縣鶴紀

垂紳正紱端嚴若神望之禹若卽之溫溫蓋其凜省身愛日之家學斯能合春風沂水之天真倘九京之

之置於座隅庶以儆朝夕云爾

言自口出萬禍之原食自口入百病之根發不可追
悔不可改山下有雷其震百里聖人象之命卦曰頤
惟慎與節汝其勉之

杖銘

其文庚庚其節繹繹天祿校書太乙之祖

自題小照

聖人四未能汝乃有百愧昨宵神告汝著力孝弟始
以聖賢為師庶幾可無悔汝今容貌間奚為尚泥泥
有餘未敢言不足自知恥庸德與庸行胡不慥慥爾

天畀汝以年欲汝知非耳汝善不能從不善不能
改汝年雖日增汝過日多矣遐哉蘧伯玉恥獨為君
子



